

G. R. Carter.

from, W. H. Holmes 1908

KA BUKE
Book of

O NA

Hawn. songs

LEO MELE HAWAII

for the good and the happiness
No ka Pono a me ka Pomaikai

O NA

Hawaiian homes

HOME HAWAII,

for friendly gatherings and for
Na Anaina Hoolaulea a me na Aha
musical assemblies
Mele Hoonanea.

Prepared and printed by
HOOMAKAUKAU A PAI IA E.

and
KEAKAOKALANI a me J. M. BRIGHT.

Ballou # 824

HONOLULU:

HALE PAI MAHU P. C. ADVERTISER,
1888.

PAPA KUHIKUHI.

	AOLA.
Adios ke Aloha	23
Aia i Alakai	5
Ainahau	74
Ahi Manu Olaa	12
Ahi Wela	54
Akahi hoi	46
Aloha oe	34
Aloha no Lilia	73
Anahulu	72
E hoona ae ana	50
Ehukai Okatoba	58
E nihi ka hele	44
E pili E pili	86
Ever Sweet	93
Ia oe ka nani pua rose	20
Ihiihi i ka Wekiu	70
Ike ia Pelekane	59
Ipo Lauae	25
Ipo lei liko lehua	92
Oni a ka Moku	28
Ua hiki no me a'u	39
Ua kea o Hana	43
Ua noho au a Kupa	47
Uluhua	27
Haupu honi i ka Makani	90
Hale Ola	54
Hawaii Pono	3
He Ai na Kalani	21
He Iniki	49
He Inoa no Kaiulani	6
He Inoa no Kaiulani	10
He Inoa no ka Lei o Hawaii	80
He Inoa no Kaleleonalani	73
He Inoa no Kapili	82
He Inoa no Keelikolani	9
He Inoa no Likelike	84
He Inoa no Liliuokalani	18
He lei na ke aloha	89

	AOAO.
He Lei no Liliu	9
He wahi kilihau anu	23
Hiilawe	11
Hoalu kipuka ili	76
Hoolale o ka Ukiu	60
Hoonona kauahele	35
Hoku Boys	83
Hole Waimea	26
Holuikawai	8
Home Puakoolau	16
Hosio	48
Hui Nihoa	70
Hulupala	68
Ka Anoi	52
Ka awa o Puna	86
Kainuwai	29
Ka oiwi nani o ke Kamakahala	55
Ka owe a ke kai	38
Ka uka i Waahila	95
Kaulilua e o mai	4
Ka Hae Kalaunu	52
Ka hanu o Evalina	81
Kahiona a na manu	80
Ka Lama Ae One	69
Ka makani Lihaupua	79
Ka Makua Mana Loa	3
Ka Malanai	88
Kapahi Blossom	41
Kapili	5
Ka Pua Kakoili	7
Kawaikini	68
Ke ahe lau makani	14
Ke ala Iliahi	56
Ke ala pua Pikake	46
Ke ala Tuberose	53
Ke Aloha Hipuupuu	51
Ke Aloha Hooheno	37
Ke ano lai mai nei kanahale	92
Kehaulani	11
Ke hone ae nei	40
Ke kaupu	15
Ke kii onohi	50

A O A O.

Ke ko mai nei ke ala	81
Kilauea	19
Kiss and never Tell	91
Kokohi	16
Koni au la i ka wai	13
Kuu Aloha la e maliu mai	62
Kuu hoa la i Halemano	63
Kuu ipo kuu lei	65
Kuu ipo. nohea	22
Kuu lei mokihana	28
Kuu wai lili Mokihana	85
Kuwili ibo au	55
Kuhaimoana	83
Kuhalahala	61
Laa hooulu kino	27
Lau ahihi o Lihue	69
Lau onaona	57
Lau vabine	14
Lanihuli	43
Lei Aloha	39
Lei onaona	51
Lehua i Hopoe	37
Lia i ka wai mapuna	80
Lihau	49
Lihi kai o Ohele	21
Lihi wai o Iao	41
Lilii Lehua i Mana	24
Lilii Mokihana	17
Lipoa aala o Lele	71
Lokoino maoli oe e ke hoa	19
Maemae Lihau	30
Magnolia	78
Mai hoeueu mai oe	72
Mahina Malamalama	36
Makalapua	66
Malanai	48
Malu Ulu	87
Manu kapalulu	31
Manu lauwili	44
Milihai Pua	63
Moani ke ala	12
Moaula	78

Mololani	47
Na Hala o Naue	88
Na Melokama	32
Nani Haili po i ka lehua	76
Nani Waipio	13
Niolopua	31
Niho	66
Nu'a o ka Palai	34
Nuhou	67
Pali Koolau	45
Pela kapu o Kakae	26
Peseki	35
Pili aoao	25
Pili kapekepeke	57
Pili palua	53
Pilipili ka ua i ka nahele	90
Pohai na Iwa	32
Poli pumehana	17
Pua Alani	42
Pua Iliahi	59
Pua Megelo Note	95
Pua nani o Hawaii	75
Pua Sadinia	60
Puu o Hulu	67
Puuhue	65
Waiannuenu	33
Wai o Kanewai	56
Wai hui o Kalena	91
Wailua alo Lahilahi	18
Waimanalo	40
Waipunalau	64
Waipunalau	93
Wahine hele la o Kaiona	7
Wiliwili wai	64
Beauty	58
Be still oe	85
Charming Ipo Lauhi	74
Come darling lei lehua	94
Sunday Manoa	77
Sweet Lei Lehua	20
Sweet Moonlight	45
Sweet Violet	33
The Eating of the Poi	96



HAWAII PONOI.

Hawaii Ponoī,
Nana i kou Moi,
Ka Lani Alii,
Ke Alii.

HUI:—Makua Lani e,
Kamehameha e,
Na kaua e pale,
Me ka i-he.

Hawaii Ponoī,
Nana i na 'Lii,
Na pua kou muli,
Na pokii.

Hawaii Ponoī,
E ka lahui e,
O kau hana nui,
E u-i e.

KA MAKUA MANA LOA.

Ka Makua Mana Loa,
Maliu mai ia makou,
E haliu aku nei,
Me ka naau haahaa,
E mau ka maluhia,
O nei Paeaina,
Mai Hawaii a Niihau,
Malalo o kou malu.

HUI:—E mau ka ea o ka aina,
Ma kou pono mau,
A ma kou mana nui,
E ola, e ola ka Moi.

E ka Haku malama mai,
I ko makou nei Moi.
E mau kona noho ana,
Maluna o ka noho Alii,

Haawi mai i ke aloha,
 Maloko kona naau,
 A ma kou ahonui,
 E ola, e ola ka Moi.

Malalo o kou ahonui,
 Na'lii o ke Aupuni,
 Me na makaainana,
 Ka lehulehu no a pau;
 Kiai mai ia lakou,
 Me ke aloha ahonui,
 E ola no makou,
 I kou mana mau.

LILIU.

KAULILUA E O MAI.

Kupu iluna kela ka Lani,
 Malamalama ka pae opua,
 Pua a mohala he lei nani,
 He mitimili na ka lahui

HUI:—E Kaulilua e o mai,
 Kalani nui poaimoku,
 Ka wohi kapu a Keoho,
 Hiialo hoi a Kapaakea.

Ike Hawaii o Keawe,
 Ua ku'i ka lono i Maui o Kama,
 Ne-i i Mōlokai a Hina,
 He hana nau e Kaululāau.

E Manokalani ko wehi,
 Ka pulapula a Keaweheulu,
 Ua ulu ua kupu i ko poli,
 Ua kumu ua mole i ou Kupuna.

KAWAIIHAU GLEE CLUB.

AIA I ALAKAI.

Aia i Alakai ka anoi,
 Na pua keu a ke aloha,
 He aloha ka-i mau loa,
 A no'u a no i ala kekahi.

HUI:—Oia 'la ka pua i poni ia,
 I kukuni paa ia ka iini,
 He iini keu na ka manao,
 O halia hana mau i ke kino.

Kuu kino kai lono i ka leo,
 I ke kani a ka manu o uka,
 Ulu mai ka manao a nui,
 Hoonua i ka lau laau.

HUI:—Au mai nei Holuikawai,
 Ma ke kihi hema o ka aina,
 Aneane hoolale na manu,
 Na kapuai kani o Ulili.

Ke nu mai nei ka makani,
 Ke owe mai nei ka moana,
 Ane hiki mai paha o Uwila,
 O ke aiwaiwa o luna.

HUI:—Nana i kaomi na mano,
 Hakukoi ka wai i na pali,
 Puluelo i ka ua kehau,
 Ua olu i ka liko o ka lehua.

KAMEALOHĀ.

KAPILI.

He inoa keia e Kapili la,
 E ka pua nani mae ole,
 I anoi ai na manu la,
 Hauwalaau ai kanahēle,

HUI:—E Kapili e, E Kapili,
 Ka wahine kui lei rose,
 E walea ana i ka olu la,
 I ka nani la o Huia.

Kahiko ka ua i kanahēle la,
 I ka liko o ka lehua,
 Ka anapu a ka uila la,
 I ka maka o ka opua,

Pi'o mai e ke anueanue la,
 I ka luna kapu la o Hulia,
 I kahiko ia no ka Home la,
 O ke kamalei o ke kaona.

E ola kuu haku kuu lani la,
 Me oe pu aku ke aloha,
 Hookahi waiwai o ka ike la,
 A maalo aku heahea mai.

D. MALO.

HE INOA NO KAIULANI.

E aloha ae ana hoi,
 I ka ua Lililehua,
 I ka lawe malie i ke pili,
 Koiawe i ka wai o Waiehu.

HUI:—Aia ilaila ke aloha,
 Aia ilaila ka anoi,
 Aia ilaila ka pilina,
 Me ka ua lokuhala o Puna,

Kuu ipo lilinoe ke aloha,
 Kilipobe ula wena i ka lai,
 Lamalama hau ili o ke koa,
 Pua-ehu i ka noe halii.

I lobia Waianu i ka nani,
 Ilohia Hiilawe i ka olu,
 Mikioi ka apona a kahi manu,
 Inu wai anuheā Olaa.

Kaua i ka nani o Hilo,
 I ka ulu lehua i Olaa,
 I ka wai lana malie i Hauola,
 E ola o Kaiuonalani.

WM. P. LELEIOHOKU.

WAHINE HELE LA O KAIONA.

Honi ana i ke anu i ka mea huihui,
 Hui hewa e ka ili i ka ua poai hala,
 Lei ana i ka Mokihana i ka wewehi o Kaiona,
 Lihau pue i ke anu hauo-ki o Kaleponi.

HUI:

E o e ka wahine hele la o Kaiona,
 Alualu Wailiula o ke kaha pua ohai,
 O ka ua lani polua po anu o ke Koolau,
 Kuu hoa o ka malu kiu, malu kukui o ka Hoiwai.

Hiaai ka welina ka nenee a ka Ohelo-papa,
 Pu-apu-a i ka noe mohaha i ke anu,
 Noho no me ka anoi-ka manao ia loko,
 Oloko hana nui pau ole i ke ana ia.

A ka wailele o Niakala ike i ka wai anuenue,
 I ka poai ai a ka ohu hali paa ilaila,
 Pue ana i ka ehu wai pupuu i ke koekoe,
 Eia iho ka mehana o ka poli o Hiilei.

WM. P. LELEIOHOKU.

KA PUA KAKOILI.

Ka pua Kakoili lani manuia,
 O manuia kalani maka puehuawa,
 He uwahi makaweo ia no Lihue,
 O na puu nanahu mahikiohao,
 O ke aka ka lani o Hikiau,
 O ka i'a kapu o Kubihewa,

HUI:—O'keia hewa e lilo ia ha'i,
 Kaa aku i ke kanaka e maha au,
 Hoi hou oe i ke ehu me he mo-i la,
 Ua ike—a, Ua ike—a.

Ike ia Kaukini he laweia manu,
 He upena kuu i ka noe kopokahi,
 Ua hoopuni i ka ohu kahakikepa,

Ke na'i la i ka luna o ka auwana,
 O kauwahi i ke kapeku e hei ai,
 O ka i'a manu o puoalii,

HUI:—O ke 'lii wale no ka'u makemake,
 O ka luhi o maua me ia nei,
 O ko makou lealea no ia,
 Ua ike—a, Ua ike—a.

Lea ka wa ana a ka ua i Mahiki,
 Ke lualai ana i puu o Moeaua,
 He hana ua like me ka puu kolea,
 Ua pahee lakou ala i ka kawelowelo,
 Oia ka wawa i ka wili wahine,
 I ke alanui wai o Kahuenaha.

HUI:—A naha ke kanaka ka hale,
 Ka hale a ke aloha,
 Ka makamaka o ka moe e kipa mai ai,
 Ua ike—a, Ua ike—a.

HOLUIKAWAI.

Eia'la, eia'la hoolalao,
 Hoonanahuki i ka bukiku ae,
 E lawe e lei a hohiehie,
 I ka poni a Holuikawai.

HUI:—Toss your elbows now Hoku boys,
 Comrades toss the elbow,
 Imua e o'u mau hoa pokii,
 Then comrades toss the elbows.

E waiho malie iho oe i kana,
 Mai apakau ae oe ilaila,
 Ua lai kena ua ane fly wheel,
 I ka poni a Holuikawai.

E noho malie iho no oe,
 O kou kuleana paa iho no ia,
 Ua lawa no oe i ka you eva iki,
 I ka poni a Holuikawai.

HE INOA NO KEELIKOLANI.

Eia ke kuko ka halia i ka manawa,
 He hiamoe ko'u hoala ana oe,
 O oe o ka Lauae kukila i ka lai,
 Ke hoe manue-a ala i ke kuahiwi.

HUI:—Kau mea hoinaina-u loa iho la no ka ia,
 O ka lawelawe malie wale ia aku no,
 Pau hewa e ka waimaka a oi eha,
 Homai—eia—hoi.

Nohenohea nohea i kanahele,
 Pa'e mai ana ka leo o ka hikihiki,
 Hiki ka ma-pu hoe i ke ku Amaunakane,
 I ka pua i ke kolokiu pu-a a kahi manu,
 Makemake wale aku no au i kanahele,
 Hiai wale aku no i ka lehua Makanoē,
 Lihaliha e ka wai mapunahea a ka manu,
 E walea ai ia kini i ke kiko pua.

WM. P. LELEIOHOKU.

HE LEI NO LILIU.

He lei la no kuu Lani,
 He wehi nou e,
 Hoohe e ka Lani la,
 Ko lei aloha e,
 Hooheo e kuu Lani e,
 Kuu milimili e,
 E kii e, e lei la,
 E Liliulani e.

HUI:—|| :Kuu lei, kuu pua,
 Kuu lei kau i ka wekiu :||

Aia ko lei e ka Lani la,
 I Paoakalani e,
 Tuberose onaona i ko poli,
 Ko lei ia e kuu Lani,

Kui ia haku ia ko ohu la,
 Ko lei aloha no,
 E kii e, e lei la,
 E Liliulani e.

Nuanua oe e ka Lani la,
 E ka pua i ka wekiu,
 Ela ko wehi la lei ia,
 Eia ko ohu e,
 Hōni ia ke ala o ko lei,
 Ke onaona o na pua,
 E kii e, e lei la,
 E Liliulani e.

S. KAPU.

HE INOA NO KAIULANI.

I aloha ia uka iuiu,
 I ka ua noenoe o na pali,
 He nahele i puia i ke ala,
 I ka liko hou o ka awapuhi,

HUI:—Lipolipo ka wai o Eleile,
 Huihui i ka noho a ka ohu,
 I mehana i ka lau a ke aloha,
 I ka pili, aoao ana iho.

No ka lau la'i ke aloha,
 No ka hoihoi lai a ka wai,
 Aia e ke hoa e like ai,
 O Like o ka wahine o ka ma'u.

Lalau na lima i ka lehua,
 Kahiko i ke kino oia kini
 I lei hoohe no ia kama
 No ka liko hou o ka awapuhi.

MRS. LIZZIE ACHUCK.

HIILAWÉ.

Haaheo e ka wai pili ili,
I ka nihi lihi ae i ka pali,
Ani ana ka makani polinahe,
Pili pono ka iini ilaila,

HUI:—Inu i ka wai o Hiilawe,
Me ka i'a miliopu i ka lima,
I'a hanai hala i ka pua,
|| : Ua he-ha Waipio i ka noe : ||

Iwa punana wai o ka liko,
I ka hana mikiala a kahi manu,
Popohe a lauki wai o kanabele,
Aniani i ka maka laulii:

Ua pa lihi mai ke ala,
O ke onaona pua Maihala,
E kala hoi ka mahui la,
I ka na-e hanu ala o na pua.

KAMEALOHA.

KEHAULANI.

Nani wale no hoi Kehaulani,
Lahalaha i ke alo o Lukini,
Aohe mea nani ole olaila,
E wae ai a ka manao.

HUI:—E pii, e pii ana au,
Iuka, iuka o Kehaulani,
Ilaila, ilaila ka anoi,
Ke koi koi a ke aloha.

Nana a pau ko makemake,
Na pua kau i ka wekiu,
Na lau wehiwehi o Inia,
Vabine lau onaona o ka uka.

Ke honi aku oe i ka moani,
Hana loku loko i ka iini,
Ilihia i ke ala nohea,
Ua ma'u i ke kehau-kakahiaka.

MOANI KE ĀLA.

Auheā la o moani ke āla,
 Hoapili o mi nei,
 A heaha kau hana e paweo nei,
 E ka makani Puulena.

HUI:—Kuhi au a he pono keia,
 Au e apaapa mai nei,
 E wiki mai oe i pono kaua,
 I olu hoi au e ke hoa.

Hooihi aku au e ike la,
 Ia wai mapunapuna,
 Rain Tuahine pio anuenue,
 Oia uka iu-iu.

Eia hoi au ua wchi,
 Ua lia i ke onaona,
 Ia wai ono a ka lehua,
 Wai mukiki a ka manu.

WM. P. LELEIOHOKU.

AHI MANU OLAA.

I ka uka holokia ahi manu Olaa,
 I po i ka uahi a noe kanahēle,
 I nohenohea i ka makani lihau pua,
 A he pua oni ke kanaka he mea laha ole,

HUI:—Owau mai kau e hea mai-e,
 E hea i ke kanaka e komo maloko,
 A e hanai ai a hewa ae ka waha,
 Eia no ka uku la o ka leo.

Ani peahi na lima o Hualalai,
 Ke kahoaka i Mailehahel,
 Iho no e ka hau kiliopu i kai o Kona,
 Iho no i ke kula pili o Moeuloa.

He alaniakea ke kai o Kailua e,
 Aole au elua he hookahi no,
 I ka i ana mai la i ke ola,
 O ke ola mau loa aku no-e.

FIGGS.

NANI WAIPIO.

Nani Waipio kahela i ka lai,
 Nohea i ka ohu kakikepa,
 Kualono iuiu huna a ka palai,
 Lipo i ka wai koiawe.

HUI:—Ua luhea, ua lupea ia lipo i ke ala,
 Luhiehu i ka wai kau a ka opua,
 Pe upe i ka wai a ka Naulu,
 Kulukulu wai lehua.

Ilaila kuu upu kuu lia ana,
 Wailele waianuhe a o Waipio,
 Ua lalawe a ninihi poahi ka wilina,
 A ka mikioi ili lahilahi.

Kohia e ke anu noe na kuahiwi,
 Lohi mai ka lawena a ke Kalukalu,
 Ho-iho kua a eloelo e ke hoa,
 Oiai ka pilina ua lai.

WM. P. LELEIOHOKU.

KONI AU LA I KA WAI.

Hooihi kahī manaō,
 I ka ehukai o Puaena,
 Kai hāwanawana i ka lai la,
 I ka lai wale o Waialua.

HUI:—Koni e, koni au i ka wai,
 Koni au i ka wai huihui,
 I ka wai alii o ke kini la,
 Olu ai ka noho'na o ka lai.

Alia oe e ka ehukai,
 E lelehune nei i ke one,
 One hanau o ke kupuna la,
 Puili laulii o ka uka.

Akahi hoi au la ike,
 Ina lai elua,
 Elua maua i ka lai la,
 Wai kapipi i ka pali.

FIGGS.

LAU VABINĒ.

Auheā la o Vabine,
Lau onanoa a ka uka,
A'u i kui a lawa,
I lei no ka manaō.

HUI:—Ua kuhi au a he pono,
Kaulili noho kahakai,
I ke kuhikuhi puu one,
Aole au ilaila.

Pau ole ko'u hooihi,
Ia kuini manu hoohie,
Kahuli leo nahenahe,
Pili lau-i o ka uka.

Ehia mea lia mau,
A loko e hana nei,
O kuu pua pisiliana,
Aia i ka waokelē.

I anoi au e ike,
I ka hau kololio i ke kula,
Kahi manu ahailono,
Na huna wai ohelo.

D. ELDRIDGE.

ĪE AHE LAU MAKANI.

Lamalama ke kino o ka palai.
I ka lihau a ka ua noe o uka,
Maemae ka liko o ka lehua,
I ka noua e ke ala lau vabine.

HUI:—O oe no ka ia,
E ke hoa o ke aheahe lau makani,
He makani na ka Moae,
Halihali ala o kanahēle.

Nani Lihue po i ka ua,
 Noho ia uka i ke onaona,
 Halia wale mai ana no,
 Ka makani lawe kehau o Panaewa.

Nani ka luna o Kaala,
 Ka waiho kahelabela i ka olu,
 O ka noho a ka opua i ka lai,
 A ka manu inu wai lehua o Kaana.

KE KAUPU.

Ia maua i hoolai iho ai,
 Kaha ana ke kaupū i ka lai,
 Ilaila ke aloha haanipo,
 Haalipo i ka poli pumehana.

HUI:—Ina pela kau hana,
 Pakela oi aku ka pipii,
 I kau hana olu noeau,
 Kohu like me Waialeale.

Kuhi au ua like me ia nei,
 Ka lalawe ninihi launa ole,
 Akahi a ike i ka noe,
 Ua loha i ka wai hoolana.

O ka hana nipo kau e ke anu,
 Ua maewa poniponi i ka noe,
 Poahiahī wale ka ikena,
 Ke koni iho koni aku koni ae.

WM. P. LELEIOHOKU.

HOME BUAKOOLAU.

He nani kanahēle la,
 Hoolau kanaka i na manu,
 E ake no au e hoi la,
 Kuu home Puakoolau.

HUI :—Kuu home Puakoolau,
 Alo hōkahi o ka uka,
 Kuu home Puakoolau,
 Home hoolono i na manu.

Ua noho mehameha no wau,
 Mawaena o na pua,
 Hōkahi hana nui a loko la,
 Ka anoi ia ia 'la e pili.

A huli ae au hoolono la,
 O ka nehe o ka lau laau,
 Kuhi au he makani hoolua la,
 Ka hiolo a ka liko lehua.

JAS. KAAHIKI.

KOKOHI.

E ka wai mapunapuna la,
 E lana malie nei i ka lai,
 Lipolipo launa ole la,
 Kau wahi ale ole iho.

HUI :—Kokohi—ehehe, i ka ono—ehehe,
 Unahe i ka poli ka wai olohia,
 Pahee—ehehe, ka momoni—ehehe,
 A he olu ka iho'na iho.

Lei ana Hiku i ka noe la,
 Hoohihi lihau i ka lipo la,
 Anehe oia la e inu la,
 Ka wawai ula iliahi.

Ia oe ka uhene e ka wai,
 Ka nenee lili i ke kulu aumoe,
 Hoolai Kauaula la,
 Kalele nuu i ka palai.

LILIU.

LILII MOKIHANA.

E maliu mai oe ke aloha,
 E lili Mokihana i ka nuu,
 E hea e kipa ka anoi,
 Ma ia pohai anuheā.

HUI:—Lia au i ka lai pohia,
 Ilihia i ka wai mapuna,
 Ka waiho kahela i ka lai,
 Poniu ailana ka manao.

Kuu ipo i ke kai uwalu ili,
 Ua lupea i ka ua lihau,
 A luhe lai i Malamānuī,
 I ka wiliokai a ka ua,

Hau anu ka iliki ana iho,
 Kaomi i manu'a kaluheā,
 Kikoo ka momoni i mau-u,
 Leha iki Maluaka i ka noe.

WM. P. LELEIOHOKU.

POLI PUMEHANA

Lia wau i ka moe,
 Hoolono i ka leo,
 Leo hone o ke Kahuli,
 Hone lua i ka poli.

HUI:—Poli pumehana,
 Moe lolii o ka po,
 Sweet ke hanu iho,
 I ke kulukulu aumoe.

Moe au a hūli ae,
 Honi ana i ke ala,
 He ala kupaoa,
 Hanu aala i ka poli.

E ake au e ike,
 I ke kumu o ke ala,
 I olu pono iho hoi,
 Ka mo-ena o kanahēle.

HE INOA NO LILIUOKALANI.

Auhea wale oe e ke Kahuli,
E ka leo nahenahe o ke kuahiwi,
A like a like sa hoene ana,
Sa uheuhene i Kawaiolohia.

HUI:—|| :E o e Kalani i kou inoa,
O Liliu o Lolokulani i ka maka :||

A he mapuna hoe ka'u i ike,
I ka halale a ke kai mahope,
Pinai pinai ana e ka ua,
Hoolalahu ana i ka laau.

LEPEKA.

WAILUA ALO LAHILAHU.

Anoai wale kahikina mai,
Ka ikena i ke anu o Wailua,
Elua maua me ka halia,
I ka piko waiolu o Kemamo.

HUI:—Nani wale Lihue i ka lai,
I ka noe a ka ua Paupili,
O ke ahe mai a ka makani,
A ka malualua kii wai o Lehua.

Hoonae ana i ke aloha,
Pehea la ia e pau ai,
Aole hoi na e hihi,
Ua olu nahe olu i ka noe.

Hiipoi ia iho ke aloha.
I mehana ia po anuanu,
Mili ia i ka la o ka makemake,
I ka la ka anoi i hiki mai ai.

WM. P. LELEIOHOKU me MRS KAMAKAU.

LOKOINO MAOLI OE E KE HOA.

Lokoino maoli oe e ke hoa,
 Ko lilo paha i ka ulaia,
 Aloha ole iho i nei kupueu,
 E au hele nei i ka moana.

HUI:—Kai no a owau wale no kai ike,
 I ka latitu oia aupuni,
 Eia ka he nui loa a he lehulehu,
 Na pailaka oia awa.

E kubi ana paha oe a e nalo ana,
 Kau hana hoehaeha naau,
 I ka nalo ana ae o kuu maka,
 Lawa pono iho ai ko makemake.

Aia imua kuu nui kino,
 Aia i hope kuu hoopilina,
 I anei hoi au eha ka manao,
 I ka lohe ana mai ua heo oe.

H. S.

KILAUEA.

Nani ka huila o Kilauea,
 I ka lawe malie i ka lai,
 Kowali lua la a hoolailai,
 Kapalili i ka ili o ke kai.

HUI:—O ka'u wili pono ana iho la no ka ia,
 I ka puuwai kapalili hoi,
 O ka'u hana pono ana iho la no ka ia,
 I ka puuwai kapalili hoi.

Nani wale hoi ka noho'na ana iho,
 E walea iki me Hanakahi,
 Puiwa au la hikilele i ka leo,
 Ina ua wali kanahale.

FIGGS.

BUKE MELE HOONANEA.

SWEET LEI LEHUA.

Be still my puuwai,
E nae iki nei,
Hanu malie nahenahe,
Sweet lei lehua.

HUI:—Be true to me fair one,
Be true to me I trow,
Give me the hand I won,
Sweet lei lehua.

Ever fresh my memory,
I dream of you my sweet,
At morn and sun set rays,
Sweet lei lehua.

FIGGS.

IA OE KA NANI PUA ROSE.

Ia oe e ka nani pua rose,
I hoope ia e ke onaona,
I luluu i ka wai anuheha,
Kiss pua he ma-u ia.

HUI:—Auhea wale ana oe,
E Princess lai o na pua,
Kuu bloom rose nani mae ole,
E hoi no la e pili.

I walea au i ke onaona,
Me Lilinoe i ke kahakai,
Kahea mai ana la ke aloha,
E hoi i ka poli o ke hoa.

He mea mau i ke kiai loko,
Ka holoholo i ka makaha,
O pau i ka aukuu ai i'a,
Manu hapapa i ka ae loko.

HE AI NA KALANI.

Ke ai nei o Kalani,
 Hamau oukou lakou nei ae,
 Mai noho a pane ae,
 Ua kapu e ka aha i ke 'lii.

HUI:—Ai—e, ai—la.

Ke ai nei o Kalani,
 I ka owene i ke kalo mana,
 Lawea mai e ka ipo Lauae,
 O ka uka iuiu o Lanihuli.

Ke ai nei o Kalani,
 I ka poi ai lehua,
 Hoowali ia e ka ipo hinano,
 Maikai he pahee ke moni la.

Ke ai nei o Kalani,
 I ka Opae mahikihiki,
 Kiina ia Fancy laulii,
 O ka ua Tuahine o Manoa.

Ke ai nei o Kalani,
 I ka i'a a he-auku,
 Hii ia mai e ka ipo aukai
 Auau ehukai o ka moana.

LILIU.

LIHI KAI O OHELE.

He haupu aloha i ka Hiona,
 Ka hahi halia i ka manao,
 I manao no, au i kanahela,
 I ka leo kaohi a ka ua.

HUI:—Ke naue ae nei e ike la,
 I ke kai i lua i ke aloha,
 A maua e alo ae nei,
 Me kuu hoa i ka makani.

A mai kua e ke hoa luhi,
 O ka Lale manu o Kaupea,
 Eia ke ala la ia nei
 No ka pua Kaioe i ke kula,

Anoai ke hea mai nei,
 O ka ua lai o ka aina,
 Ke nupu'la no i ke one,
 I ka lihi kai o Ohele.

Hele mai nei loko a niua,
 A poluluhia luhi ka mañao,
 O oe no ka paha ia la,
 A ke onaona e hea mai nei.

FIGGS.

KUU IPO NOHEA.

Auheā wale ana oe,
 E nohenohea i ka wao,
 O ka oi oe o ka nani,
 Helu ekahi a ka mañao.

HUI:—Kuu ipo nohea,
 Naue-naue mai ianei
 Kuu ipo aloha,
 Neenee mai a pili.

O oe ka anohi daimana,
 I anapa i ke awakea,
 O ka'u lia mau ia,
 No kuu lei mae ole.

Malama pono ia iho,
 Ke aloha o kua,
 He ukana luuluu ia,
 Au e hiipoi ai.

LILIU.

ADIOS KE ALOHA.

E kuu Belle o ka po lailai,
 Ka lawe malie a ka mahina,
 Ko aniani mai nei e ke ahe,
 Ahea oe hoolono mai.

HUI:—Ahea, ahea, oe hoolono mai;
 I nei leo naheanhe,
 Adios, adios ke aloha,

E ka hauoli iniki puuwai,
 E ke aloha e maliu mai oe;
 Ke hoolale mai nei e ke Kiu;
 Ua anu ka wao i ka ua,

Hookahi kiss dew drop he ma-u ia;
 E ka Belle o ka noe lihau,
 Eia au la e ke aloha,
 Ke huli hoi nei me ka neo.

HE WAHI KILIHOU ANU.

Oi ole anu wale ai no,
 I ka ua pee poli i kanabele,
 I ka miki koiawe a ka hau,
 Kikikoele i ke kula.

HUI:—Kiliopu mai nei e ke anu,
 Kili-kili hau i kuu poli,
 Konini kalaihi ka opua,
 I ke kuwai ia e ke Kiowao.

E iniki aku wau ia oe,
 E ke hoa lai pukui anu,
 I koni iho a hoomau,
 A hai e malule i ke anu,

Auheā oe e Ilikipau,
 Ina iho kau hooni waiānuhea,
 Ua hele mai nei a niua,
 Ka moena i ka poli o Maliō.

Pehea la e pau ai keia anu,
 E kokoni loku nei ia loko,
 O loko hana nui hoekepue,
 Pupuu anu o Waiōmao.

WM. P. LELEIOHOKU

LILII LEHUA I MANA.

A he hale kipa no'u ke aloha,
 A he makamaka no ka malihini;
 A o ko'u kuleana no ia,
 A'u i noho ai a kupa.

Hui:—Lilii lehua i Mana,
 Wehi ai na manu ilaila,
 A ike i ka ono oia pua,
 E mahie luna oi ala.

Na'u i kanaenae aku,
 Na hene oia kuahiwi,
 Lohe ai ka luna i Mauoni,
 Hauoli ke ala iliahi.

A i hewa no i kahi manu,
 I ka lawe lau olelo,
 Lohe aku nei Hiiaka,
 Ka wahine i ka poli o Pele.

ELIA.

PILI AOAO.

O ka ponaha iho a ke ao,
Ka pipio malie maluna,
Ike oe i ka hana mikiala,
Nowelo i ka pili aoao.

HUI:—Maikai ke aloha o ka ipo,
Hana mao ole i ka puuwai,
Houhou liilii i ka poli,
Nowelo i ka pili aoao.

Amau ka pilina olu pono,
Huli ae hooheho malie,
Hanu liilii nahenahe,
Nowelo i ka pili aoao.

Polinahe ka wilina a ka ua,
Waipuna i ke alo o Hiilawe,
A kena ia wai huihui,
Nowelo i ka pili aoao.

JOHN MEHA.

IPO LAUAE.

Auheha wale oe e ka ipo lauae la e,
Kuu hoa haihai olelo,
Papa leo pu kaua la e,
A o ko'u time pono keia.

HUI:—E kuu ipo kuu aloha la e,
A o kou chance pono keia,
Kiss me my Darling hoomau iho la e,
A eia kaua i ka pili o ke ao.

Ko leo nahenahe ka'u aloha la e,
I ka pane ana mai ia'u nei,
Ho ae kaua i ka uka waakele la e,
E huai pau ai na ai a ka ui.

Auheha wale oe kuu aloha la e,
A e lohilohi apa mai nei,
A e wiki mai oe e apa nei la e,
O loa kaua i ka Makai Kiu.

W. A. KIHA.

PELA KAPU O KAKAE.

E ka ua Kanilehua,
 Kui ia na lehua o Panaewa,
 Na ka Puulena e lawe mai;
 I wehi, i ohu no Kalani,

HUI:—E ka pela kapu o Kakae;
 Kui ia mai na pua,
 Na ke Kilioopu i lawe mai;
 I wehi, i ohu no Kalani.

E ka ua Apuakea,
 Kui ia mai na ahihi,
 Na ka Malanai e lawe mai;
 I wehi, i ohu no Kalani.

E ka ua loku o Hanalei,
 Kui ia mai na Mokihana,
 Na ka Lupua e lawe mai.
 I wehi, i ohu no Kalani.

KAWAIHAU GLEE CLUB.

HOLE WAIMEA.

Hole Waimea i ka ihe a ka makani;
 Hao mai na ale a ke Kipuupuu,
 He laau kalaihi na ke anu,
 Oo i ka nahele o Mahiki,

HUI:—Ku iho i ka pahu ku a ka awaawa;
 Hanane ke kikala o ko Hilo kini,
 Hoi luuluu i ke one o Hanakahi,
 I ka pololoua wahine o ka lua.

Ku aku la i ka mala a ke Kipuupuu,
 Holu e ka maka o ke Koauli,
 Niniau eha e ka pua o Koaie,
 Ua eha e kanahela o Waika.

Hoe Puna i ka waa palolo a ka ino,
 Hoocheno i na hala o Kookoolau,
 Ua eha i ka makili'a e ka Ulumano,
 Hala ae ka maka ihe a ke A'e.

KAWAIHAU GLEE CLUB.

LAAU HOULU I KE KINO.

E ke aloha e maliu mai,
 Oiai ke aloha i ke kino,
 Ua kui a paa ka lei,
 I wehi hooheho no Kalani.

HUI:—Auhea wale oe e ke aloha,
 Laau hoolu i ke kino,
 Haila kaua e pili ai,
 I ka olu o Wailana.

Ua lana loko i ka makemake,
 I ka nani o Mailehahei,
 I uhene i ka poli o Malio,
 I ka ne maluaka a ka wai.

Ua la'i no au me Hiku,
 Me ka eueu o ke kualono,
 I walea i ke kui ohelo,
 Ai ono a na manu.

KAWAIIHAU GLEE CLUB

ULUHUA.

Aia i ka wekiu la,
 Kuu lei lehua puakea,
 Maholehole lua i ka lai la,
 I ka luna kapu o Hanakahi.

HUI:—Uluhua, uluhua wale la,
 I ka ua kani lehua,
 I ka loku hala ole i ka pua la,
 Ke pu-a mai la i ka iu.

A he kiu ka lama na ke kukui la,
 Nolu ana i ka wai hali la,
 Uluku aenei hoi loko la,
 Aneane hakukoi i ka lihi.

Auhea oe e Kapuulena la,
 E maliu i ka nani o Panaewa,
 Ua hele a nohea i ka wao la,
 Lamalama i ke oho o ka palai.

ONI A KA MOKU.

A mai kua e ke aloha,
 E ka iwa kui pua o uka'
 Noho ana i ka malu a ke ao,
 I ka olu kukui wehiwehi.

HUI:—Kua i ka oni a ka moku,
 Ka pipii a ke ana wai mahu,
 Ka paona kanalima ka heluna,
 Pau mai ka palena iliwai.

Ka owe nenehe a ka wai,
 Hene ana i ka piko o lalo,
 Kahiko i ka hale a ka noe,
 Ka uhene a ka wai i ka ili,

Heaha la ia i ka uhene,
 I ka nawe malie i ko piko,
 Inu aku ilaila eloelo,
 Kahela i ka hana a ka noe

KUU LEI MOKIHANA.

He aloha kuu lei Mokihana,
 I popohe i ka uka waokele,
 Anuhua ke ala o ka Lapae,
 Moani i na pali o Haupū.

HUI:—Kuhi au o kuu ipo la'
 Ke ala hoene i ka poli,
 Eia ka o ka hau kolonahe,
 O ka po mahina lailai.

Upu mai nei ka manao,
 E ike i ka wai o Kemamo,
 He manao paa ko'u ia iala,
 No ka Iwa kiani o ke Kaona.

Mai noho oe a lou iki,
 Eia ianei o iala,
 E ike auanei oe,
 I ka hana a keia eu.

Ua lai ka makani Puulena,
 Me ke Kiu inuwai o Lehua,
 E lua maua i ka pilina,
 I ka hale wehi a ke aloha.

MARYANN. BUSH.

KA INUWAI.

Maikai ka makani o Kohala,
 Ike ia e ka Inuwai,
 O ka wai no ia pono kaua,
 Wai kaulana o ka aina.

HUI :—Ko aloha, ko aloha ka'u mea nui,
 He makana, he makana na ka puuwai.

Nani wale Niulii kahela i ka lai,
 Ekolu opua i hiki mai,
 Alai ia mai e ka ulu hala,
 Nalowale ka luna o Hapuu.

Haaheo ka hau i ka mauna,
 Kahiko i ka ohu o kanahela,
 Ke kaohi mai nei Lilinoe,
 I ka ohu noe i ke kuahiwi.

Ne hone ka leo o ka wai,
 Hone ana i ka iwa,
 Kuu iwa kuu lei kahiko ia,
 Na pua lehua o Awini.

WM. SHELDON.

HE INOA NO KA LEI O HAWAII,

E ke aheahe lau makani,
 O ka ua Kanialehua,
 E hai mai oe e ke aloha,
 No ka wehiwehi o Hilo Bay,

HUI:—Kuu aloha e, kuu aloha e,
 O ka po anuanu o ke Kaona,
 Me oe ka anoi ka halia pu,
 O neia puuwai kapalili.

Hookahi no a'u mea nui,
 O ko leo la e ke aloha,
 A pane mai oe olu iho au,
 I mehana pu nei po anuanu.

KAPILI.

MAEMAE LIHAU.

Maemae Lihau po i ka lehua,
 Kupu kelakela i ke alo o malama,
 Me he lama la ko aloha e ka ipo,
 Ke hiki mai hiki mai.

HUI:—Aia a hiki mai ka halia io'u nei,
 Me he uwila la i ka maka o ka opua,
 Ua puia e ka liko pua o ka hinano,
 Ke hiki mai hiki mai.

Hiki mai ana he kamahela alo anu,
 I lawea mai e ke ala Lauae,
 Ua hele a puia i ke onaona,
 I ka nou-a e ke kehau.

Hiai hewa ana au ia iala,
 Laahia nei kino i ko leo,
 I lei i home no'u ko aloha,
 Kuleana ai kaua,

MRS. EMA KAPENA.

MANU KAPALULU.

Noho nani iluna ke ao opua,
 Noho ihi kapu i Kilohana,
 Haiamu iho la ka lehua,
 I na manu.

HUI:—Kulikuli au ia oe manu kapalulu,
 Hana wale mai nei ia'u,
 Heaha hoi oe i ko'u manao,
 Ae no hoi.

Olelo ana oe i ko hai kee,
 Eia iho me oe,
 Na aumakua pee i ka poli,
 Ao luau ia.

NIOLOPUA.

Nani wale ka noho'na o Niolopua,
 O ka home o na manu i ka iuiu,
 O ka wai o Iauwai ka'u aloha,
 I ka hu mawaho o ka palena.

HUI:—E o mai oe i kou inoa,
 E ka awa lau lena o ka mauna,
 Hookahi hoi oe eha makou,
 I lima i ka Mamo hulu laha ole.

Kulikuli wale au i ka manu,
 Kahi Elepaio o Honolii,
 Liliu hoi oe i ko'u manao,
 Na hulu elua i ka puapua.

NA MOLOKAMA.

Aloha au o ka laula o Kapaa ea,
Ke akea maikai o ka Ipuhaa ea,
Koha ka leo o Kawaikini ua lai ea,
Ka wawalo i ka ohu noe na mauna ea.

HUI:—Uina ka wai o na Molokama ea,
Kama ia ke aloha paa iloko ea,
Huna ia iho no he mea hilahila ea,
Mai hai oe o lohe auanei ea.

Kikoo ka puu momoni i ka makemake ea,
Makemake no au e lawe na'u ea,
Aloha kealia o kalo Makaopii ea,
O ka pipii aku no ia i kahi kapu ea.

POHAI NA IWA.

Pohai na Iwa o ke kai,
I ka welo a ka hae Kalaunu,
Haaheo ka welona i ka makani,
Na ale nupanupa o Lehua.

HUI:—A heaha ka hana ka opua,
Kahiko mai la i ka ilikai,
Hooipo ana paha me Kaula,
Me ka olali Kuhaimoana.

Ua ike i ke one o Nonopapa,
Ua inu i ka wai o Puuwai,
Ua lihi lou paha ka mana,
Na Ulu hua i ka hapapa.

Ike-maka i ke kai holuholu,
Na ale o kai Okia,
He makana ka Liliuonamoku.
I ka poli o Palepalemoana.

MRS. WILSON me D. LAIKA.

WAIANUENUE.

Nani Waianuenu,
Kilihune mai la iuka,
Ia wai makaikai,
A Poomaikelani.

HUI:—Lei aloha lei lehua lipo i ka wao,
Onaona oia uka anuheia i ke ala,
He ma-pu ala huihui hoala hiamoe,
E iniki mai ana ia'u ina kaua e ke hoa.

Nani Lanikealani Hale,
Wehi i ka Lehua,
Ulu wehiwehi i na pua,
Onaona oia home.

Hanohano Kilohana i ka uka,
Wehi i ka lehua,
I lei kahiko ia,
No Poomaikelani.

POOMAIKELANI.

SWEET VIOLET.

Auheia la o Anoi hoapili o moonlight,
Hoa alo ehuehu o ka po mahina lai,
Ua lai ka helena aohe auau kai,
Ua maa i ka uli ke steer pololei.

HUI:—Hooihi ka manao ia sweet violet,
Pua ala huihui o ke ano ahiahi,
Ahi wela ke aloha e lalawe nei i kuu kino,
Kuu kino ke alo nei i ke aloha o kaua.

Ua lai no hoi oe e ka ua Lanipili,
Pili ia e maua ka ua me ke koekoe,
I mehana hoi au i ko leo e ke hoa,
Kuu hoa o ka anoi o ke kuluaumoe.

ALOHA OE.

Haaheo e ka ua i na pali,
Ke nihi ae la i kanahelu,
E uhai ana paha i ka liho,
Pua ahihi lei o uka.

HUI:—Aloha oe aloha oe,
E ke onaona noho i ka lipo,
I fond embrace a hoi ae au,
Until we meet again.

Ka halia ko aloha kai hiki mai,
Ke hone ae nei i kuu manawa,
O oe no ka'u ipo aloha,
A loko e hana nei.

Maopopo kuu ike i ka nani,
Na pua rose o Maunawili,
Ilaila hoohe na manu,
Mikiala i ka nani oia pua.

LILIU.

NUA O KA PALAI.

Kau ano mai ana ia'u la,
Na kulu paka ua eloelo la,
Elo oe elo au i ke anu la,
Pulupe pa'u i ke anu,

HUI:—Aia i ka nua ka palai la,
Ka wewehi wai olu a loko la,
Halialia mai ana la,
Ia'u puuwai kapalili.

Ka-o Hanalei i ke anu la,
Hanupanupa i ke koekoe la,
Koekoe au ia oe la,
E ka pua kuu pua i ka iu,
Halanalana i kuu maka la,
Na kipona wai anuheala,
I nohe nohea i ka lai la,
Mino olu i ka lau Aalii.

WM. P. LELEIOHOKU.

HOONAONA KANAHELE.

Eia au la e ka noe,
 Kahakoi wai a ka neki,
 Ua hana makaha ia,
 I ka luna o Waialeale,

HUI:—Hoonona ana kanahēle,
 Hoomahie-lua i ka lehua,
 Ua hana kihene ia e ka liko,
 E ka maka-hawai a ka ua,

Eia iho hoi ka pilina,
 I ke ala o ka Waikini,
 I ka milikaa ia e ka ohu,
 I ka hene wai a ka ua.

Hoomahie au i ka leō,
 I ka hookani ia e ka manu,
 E ka manu puapua eueu,
 Pa lihi pa Eheu.

Kahiko nani o Alakai,
 I ke kapa ua a ka noe,
 E walea ia e ke onaona,
 I ka piwai Mokihana.

FIGGS:

PESEKI.

Akahi hoi au a pili,
 I ka poli pumehana oi ala,
 Aniani i ke kau o ka lia,
 I ka po mahina lailai,

HUI:—Akahi po anu e ke hoa,
 Ke ko mai nei e ka hau,
 Ua lai ka nanea ana iho,
 Ka pilina i ke kulu aumoe.

Akahi hoi au a li'a,
 I ka nani oia kualono,
 Anehila i ke Kulaokahua,
 I ka po mahina lailai.

Peseki ke aloha o ke kau,
 E liula mai oe e i ala,
 E anéhila Puakomela kaua,
 Peseki e ka enamanu o ke ehukai.

Akahi hoi au a lai,
 Kahiki'na mai a ke aloha,
 Elua maua i ke kaunu,
 I ka wai koiawe i na pali.

KAPILI.

MAHINA MALAMALAMA.

No ka liko ahihi ke aloha,
 Ke ala kolonahe i ka poli,
 O ka'u mea a e li'a nei,
 E kui me ka'u manai.

Hui:—Ka'u ia e li'a nei,
 Mahina Malamalama,
 Ke ike aku oe i ka hiona,
 A he nani kaili puuwai.

Mea ole ke anu i ka manao,
 Ka iniki wela i ka puuwai,
 Me he la e i mai ana,
 E hoi maua e pili.

A he kula loa iho ia,
 E noke ai oe akena'
 A lawa pono ko makemake,
 Ka nence a ka lau naenae.

JOHN. MEHA.

KE ALOHA HOOHENO.

Auheā wale oe e ka ipō pee poli,
 I popohe i ke ano wai-liula,
 A he lei mamō oe no ke ano ahiahi,
 E uhene ai me li'a i ka uka,

HUI:—Hooheho māi ana ke aloha ia'u,
 Me he kui houhou'ala i kuu poli,
 He halia mau ia no ka midnight,
 No ka po huihui kehau anu.

Ha mau kaua la e ke hoa,
 Oiai eia i ka nuku wai,
 Waiwai paa ka manao ia oe,
 I ka nihi mai i ka welelau pali.

Me oe aku hoi ka anoi pau ole,
 A nei puuwai e oni nei,
 Mai hooheho oe i ka ike lihi mai,
 Pulu pe ai i ka ua noe.

JOE HELELUHE me JOE AĒA.

LEHUA I HOPOE.

Hooipo mau no ke aloha,
 Me ka ua tilihune o uka,
 Noenoe māi ana ke aloha,
 I ka lehua neenee i Hopoe.

HUI:—E lili lehua i Hopoe,
 E popohe mai la i ke pili,
 E pili ke aloha me oe,
 Me ka ua tilihune o uka.

Hooipo mau no ke aloha,
 I ka pua aala o ke Aalii,
 Lolii ke aloha i kuu kino,
 Me ka ua tilihune o uka.

Nawai e ole ke aloha,
 Ua pulu maua ilaila,
 Loku ana i ka puuwai,
 Me ka ua tilihune o uka.

He aloha ka lehua i Hopoe,
 E hone mai nei i ke kula,
 E hoi maua e pili,
 Me ka ua tilihune o uka.

J. NAWAHI.

KA OWE A KE KAI.

Ka owe nenehe a ke kai,
 Hone ana i ka piko waiolu,
 Ilaila wau la ike,
 Kiliopu maua i kanahale.

HUI:—Ei ala e maliu mai,
 Eia ke aloha ia nei,
 Hiki mai ana i ka po nei,
 Kiliopu maua i kanahale.

Kuu ipo i ka hee pue-one,
 Me ke kai nehe i ka iliili,
 Nipo aku ilaila ka manao,
 Ua kiliopu maua i kanahale.

Hiki e mai ana ka makani,
 Ua hala e aku e ka puulena,
 Ua loose kou chance e ke hoa,
 Ua kiliopu maua i kanahale.

LEI ALOHA.

Noenoe mai ana ke aloha,
O ka noe lehua o Puna,
Haila ka anoi ka halia,
I kuu ipo lei aloha.

HUI:—E lei aloha,
Kuu lei aloha,
Nau wau na'u oe,
Nou keia ilihia.

Nolupe ke ala o ka liko,
O kuu ipo pua hinano,
Kuu kama pua koolau,
Imi ia e ke aloha.

Kilakilā kulana oia kini,
Kela i paia e ka nani,
Oni no e kela iluna,
E pili me kuu aloha.

JESSIE KAAE.

UA HIKI NO ME A'U.

A heaha ka hana ka opua la,
Hoolai o ke ahiahi,
E i mai ana no ia'u la,
Ka iini pau ole a ka puuwai.

HUI:—Ua hiki no me a'u,
Ke ala o ka vabine,
E ake ana ro e ike la,
I ka nani o na pua.

Ua upu mai ka manao la,
Kuu hoa hooheno ahiahi,
A he ole ka maliu ia mai,
Ua pulu i ka hunahuna !

WAIMANALO.

Ia'u i halia ai i ka moe,
 A kahelahela kuu kino,
 Oni ana hooipo a hoo hauoli,
 Ka ninihi a ka Maluakele.

HUI:—Na ke aloha la i hanai mai,
 I kuu la pololi hoi,
 Na ka halia la i hooinu mai,
 I ka manawa ono wai hoi.

Ia'u i hoolai ai i ka moe,
 Hiki ana ka onohi i kuu maka,
 E hapahapai ana la e lana ka manao,
 E hui ka opua me ka la.

O kuu ipo milo wai a ka la,
 O ka awa ili-lena a ka manu,
 Mai mauna oe i ka lihi-wai paa,
 Oi kului kuehau ka manao.

Ua lai kanahale o Kalahiku la,
 Kula kapule-hei a ka manu,
 Hoo haili mai ana o Alihiwai,
 I poi-waikea na ka hau.

FIGGS.

KE HONE AE NEI.

Luhi hewa nei kino,
 Mamuli o ko leo,
 A elua maua,
 I kolu i ke ahe a ka makani.

HUI:—Ke hone ae nei,
 Hone i ke kumu o ka hala,
 A he hala ole ka ke aloha,
 O ka pulale ana mai.

A he kiu ka makani,
 Hoo hae ana i ka naulu,
 A he wai olu ia,
 No ka luna o Piiholo.

R. WAIALEALE.

LIHI WAI O IAO.

Anhea wale ana oe,
Lauae o ke koolau,
Lei mae ole a ke aloha,
I pilia me ka ua liilii.

Hui:—|| : Pulu au i ka ua,
I ka lihi wai o Iao: ||

Hooihi aku ka manao,
Ia uka ku-kilakila,
I puia me ke onaona,
I ka lihiwai o Iao.

Hoolai na manu oia uka,
Hoonuanua i ka lehua,
Papahi lei rose oia wao,
I ka lihiwai o Iao.

Me ia green valley ka anoi,
Ka maile lau liilii,
I pulu i ka ua tilihune,
I ka lihiwai o Iao.

JACOB FISHER.

KAPAHĪ BLOSSOM.

Kahiko ka nani i Kapahi,
Ka lehua ula wena i ka pali,
I mohala i ka welelau pali,
I ka luna iu o Makaleha.

Hui:—Ilaila kuu upu kuu lia ana,
Wailele waianuhea o Waiehu,
I ehū la ia i ka pilina a ke ala,
A ka maoli ili lahilahī.

Lahilahī ke alo oia uka,
Kilakila i ka maka o ka opua,
Hookahi pua nani o ka lipo,
Ka onohi Waianuenuē.

Nani wale ka luna o Kilohana,
Lamalama i ke oho o ka palai,
He moani aala Lauae,
Ka'u i honi ai a poponi.

Me oe ka anoi e pili ai,
E ka ipo lei Mokihana,
Ka'u hana mau no ia o ke aloha,
I hoa no ka iu anoano.

ISAAC IAEA.

PUA ALANI.

Kuu pua Alani kuu ipo ia,
Kuu lei Pikake lei o ke aumoe,
Lei aku maua i ka pili o ke ao,
Hooheho ke aloha me he ipo ala.

HUI:—Ua pono no oe e ka inuwai,
I ka lawe a holu i ka lau o ke pili,
Komo pono aku la oe i ka ai a ka lua,
I ke ala pii a ka opae.

Hiaai aku au a e ike,
Ke ala onaona a o pua ke kiele.
Ka moani huihui i ka pili o ke ao,
Ka iniki walanua me he ipo ala.

Ua pulu maua i ka ua kilihune,
I ka wai lihau aala o ke kini,
Poiu noii mikioi nowelo,
O ka apa a ka ua i kanahelu,

Haaheo e ka maka o ka opua i ka lewa,
Ua kohu no e like me ka Iwipolena,
Ka nunu'a i ka liko pua o ka Ohelo,
I ke kaha a o Iloli.

JUNIOR MAIKEIKI.

UA KEA O HANA.

Alia oe e Haleakala,
 E alai nei ia Kauiki,
 He makani ino ae keia,
 A he Ulumano no ke kai loa.

HUI:—Noenoe ua kea o Hana,
 Hoapili o ka malualua,
 Elua maua i ka piko,
 I kolu i ke ala Lipoa.

A i hewa no i kahi ale iki,
 I ka ahai hua Limukala,
 Pa no kahea a Mokumano,
 E hoi maua e pili.

Na'u oe i hookohu aku,
 I kapena no ka Naukilo,
 Ike ai i ka hana a Mokumano,
 I ka ihu o ka waa Hawaii.

LANIHULI.

Uluwehi ka luna i Lanihuli,
 Pulupe i ka nihi a ka ua,
 A o oe a owau ilaila,
 I ke onaona o kanahela.

HUI:—Pulupe nei ili i ke anu,
 He anu mea ole i ka manao,
 Kuu ike ia oe e ke aloha,
 Hoi pono ka iini a loko.

Ilaila lia ka manao,
 Pukui i ke anu a ka ua,
 Kolonahe ae la i ka uka,
 Me ka dew drops o kanahela.

E maliu mai oe e ke aloha,
 Kuu dear love o ka po lai,
 Buenos once more e ke hoa,
 Ko'u time huli hoi keia.

E NIHI KA HELE.

E ka moana nui kai hohonu,
 E lana malie kou mau ale,
 E ka makani nui ikaika,
 E pa ahe malie oe.

HUI:—E nihi e ka hele mai hoopa,
 Mai pulale i ka ike a ka maka,
 Hookahi no makamaka o ke aloha,
 A hea mai o Kalani e kipa.

Ike ia Kaleponi he aina anu,
 He hau hookuakea i ka Ili,
 Lamalama i ka ili o ke kama,
 Ka wahine i ka iu o luna.

E hele me ka poina ole,
 E huli e ke alo i hope nei,
 Eia ko lei Kalanuu,
 O ka onohi o Hawaii.

HUI HEANANI.

MANU LAUWILI.

A he keu kahi manu lauwili la,
 E hokai nei mamua,
 E alai nei i ka noe la,
 Hooneenee mai i ke kula.

HUI:—Kupilikii mai ka manao la,
 Aia la ihea o Malio,
 Aia paha oe i kanahela la,
 I ka poli nahenahe o ka ipo.

Hoapaapa lua hoi oe la,
 Hooluhiluhi i kuu nui kino,
 I o hoi oe ianei la,
 I ka nui manu o ka uka.

Ua ana aenei hoi au la,
 I kau mau hooluaiele,
 Pau au me oe e ke hoa la,
 Ua osi hoi oe maanei.

SWEET MOONLIGHT.

Auheā wale oe e sweet moonlight,
 E ke onaona e hea mai nei,
 Eia hoi au kā maile laulii,
 I moe i ke anu o uka.

HUI:—E kiss goodnight oh sweet moonlight,
 Ke ua tilihune mai nei,
 Hoolai na manu lūhe me ka palai,
 Hoope aala o kanabele.

Ua nani no oe e beauty Laniuma,
 E kahi manu hulu laha ole,
 Ua hanu ia aku kou meheu,
 E ka ua tilihune o uka.

E ake wale au e ike la,
 I ka ua lanipili o uka,
 Hooipo mau no ke ala huihui,
 I ka pua o ke aalii.

A K KUNUIAKEA.

PALI KOOLAU.

Auheā wale ana oe,
 Ka ui o na pali Koolau,
 Hoi mai e pili,
 Oiai ua like ka manao.

HUI:—O oe ka beauty oia uka,
 Helu ekahi o ke onaona,
 Ua puia uka e ke ala,
 I ka lawe a ke ahe kehau.

Nani wale ka luna i Lanihuli,
 I ka holu a ke oho kawelu,
 O ka pa a ka makaʻni Malanai,
 Kololio i ke kowa o Nuuanu.

E hoi e ka ui o Koolau,
 Oiai ua malu na pali,
 O ka nee a ka ua Apukea,
 Kahiko i ke oho o ka palai.

AKAHI HOI.

—
 Aloha wale,
 Pua hinahina,
 I lei hoohe,
 No kuu kino.

HUI:—Akahi hoi,
 Ka hikina mai,
 Ke aloha naenae,
 Hone i ka lipo.

O loko hana,
 Nui ka anoi,
 Ka halia ana,
 Me ke aloha.

FIGGS.

KE ALA PUA PIKAKE.

—
 Auhea wale ana oe,
 E ke ala pua Pikake,
 Ka iini kau a loko,
 E loku nei i ka puuwai.

HUI:—E ake no au e ike,
 Ia ke ala pua Pikake,
 Kuu lei o ka la walea,
 Hoa kaana o ke aloha.

Kau nui aku ka manao,
 E ake no a ike,
 I ke kumu o ke ala
 E hone nei i kuu poli

E o mai i kou inoa
 E ke ala pua Pikake
 Ina o ka lia a loko
 He makana ia na ka puuwai.

MOANIKEALA.

MOLOLANI.

A he ike ana aku ka'u,
I ka ua o ka hooli'o,
I ka nihi malie ae,
Mauka o Mololani.

HUI:—Inoino mai nei na pali,
Ua puhia e ka ehukai,
O ka holo a ke ahole,
Ka i'a kiai loko.

Kai no ka pua lehua,
Ua kapu i ka malihini,
E hele no i ke ala,
E nihi mai lawehala.

E noho ae no au,
I ke kau a ke aloha,
Me Violet in Bloom;
I ka olu o Iolani.

UA NOHO AU A KUPA.

Aia i ka wekiu ka pua lehua,
Ke o-na ia la e na manu,
Pili ia e ka makani Waiolohia,
Laahia wau i ka maluakele,

HUI:—Ua noho au a kupa i ke alo,
A kamaaina la i ka leo,
Ka hiona a ka manao ilaila,
I anei ka waihona a ka manao.

Pa'e mai ana ka leo o ka Hikihiki,
Hiki mai ana ke ala o ka Fesia,
Sila ia ke aloha welawela,
E hoi kaua la e pili.

HOSIO.

E aloha ae ana wau,
I ka lau aala vabine,
I ka nehe nenehe i ke aumoe,
Ka owe mauka iuiu.

HUI:—Maluna ka ihōna iho,
A ke kiu inuwai o lehua,
Hoolōno o ka leo o na manu,
I ka hauwalaau i kanahēle.

He libano tuberosē ka'u i ike;
Ka ninihi ae ma kae pali,
I hosio aku hoi au,
A he ole ko iala maliu mai.

E kala ko iala eena,
Ke hīu ala ko iala pea,
Ke ahaī ia ala ke aloha,
Na kapuai kani o Melekini.

Ka mikina ana aku mahope,
Hoolai o Dickey i ke kula,
Pukui ke aloha mesalina,
E huli hoi a he kula loa.

MARYANN BUSH.

MALANAI.

Ke noe mai la e ka ua,
Lawe nihi lau laau,
Kili pohe mai la i luna,
I ka nuku wai a ka manu!

HUI:—Malanai anu ka makani,
Nahēnahe ka pilina mai,
Haaleale mai ana,
I ka lihi wai mapuna.

Ua lana mai ka manao,
I ka hanu o na pua,
E kukupu i ka ni'o,
Paepae kapu o Olono.

HE INIKI.

Auhea wale oe ke aloha,
 Hana mao ole i kuu kino,
 Eia ia nei ka iini,
 Ka manao hoi lua a ka puuwai.

HUI:—He iniki la he iniki,
 He iniki welawela ka ke aloha,
 Hui-e, hui, la hui eha,
 Hui konikoni i ka puuwai.

Pa mai ka makani kaulana,
 Kilioopu o Waihee,
 Ko mai ke ala huihui,
 Hoihoi la i o Eleile.

LIHAU.

Lohe mai au i ka Wapine
 Manu lawe lei a ke aloha,
 Eia uka o Maukele,
 Halialia mai ana,
 Ka nohona oia uka,
 I walea i ka nui manu,
 I ka ne hone i ka po lai.

HUI:—Lohe mai au i ke Kolohala,
 Manu hooihi a ka malihini,
 I ke kani hone i ke kula,
 Kau ka halia i ka po lai.

Ka'u kuuna ia ua lai,
 Ua apo e ka i'a o ke kai uli,
 Ua mau i ka'u pae i koi,
 Ka liko lehua o Lihau,
 Haupupu mai ana,
 Ka helena oia mau aekai,
 I ahona i ka i'a kiai loko,
 I ka pohai mai i ke ala.

R. WAIALEALE.

KE KII ONOHI.

U-o aku mali i kona kaula,
 Na pua i kui ia e Hiku,
 Ka manai ana a ke aloha,
 Pela ka manao i hoolawa ai.

HUI:—I aha ia hoi ke kii onohi?
 I ke kii hooihi a ka lihilihi,
 I ka loku umii a ke onaona;
 Pela ka haili ana i ka leo:

O ka manao ia i hoolawa,
 I hoohei ai ia pua i ke aloha;
 E aloha mai oe pela hoi au,
 I hookahi pana ana a ka puuwai.

HUI HEANANI:

E HOONA AE ANA.

Hoolana ae ana i ka manao,
 I kahi hoi e maha ai,
 E aho ia oe ia unu,
 Ia'u hoi e maha ai.

HUI:—E hoona ae ana i ke aloha,
 Pehea la ia e pau ai,
 Ua kuhinia i ka manao,
 I ke kahi ia e ke aloha.

Owau ka ke aloha i hiipoi,
 I hoona-ku i ka manawa,
 O ka manao ia e lia nei,
 E hakui i ke aloha i laka mai.

I mahui no au i ko leo,
 I ko hoolaaui ana mai,
 Pela i haili ai ka manao,
 E lawe a lilo oe nau.

J. L.

LEI ONAONA

Hooihi aku au e ike,
 I ka wai aniani o ke kaona,
 Oia wai ono a ka manu,
 ||:Kaomi ana i ka manao:||

Olu lai ka pilina a Puaalii,
 Oni malie i ke alāhao,
 Ilaila oe la ike maka,
 ||:Ka niniu poahi a ka huila:||

Aloha au i ka leo o ka manu,
 I ka hone i Mauna Aloha,
 Aloha au o ka mahina hiki ahiahi,
 ||:A he hoapili ia no ke ala:||

O ke aheahe mai a ke kehau,
 Hali mai ana ke ala onaona,
 Olu lai ka walea ana iho,
 ||:Ma ka poli nahenahe o ka ipo:||

J. C.

KE ALOHA HIPUUPUU,

Anoano e halia mai nei ia'u,
 Kuu ai lehua i ka liko,
 Ke aloha kai kipa mai ia nei,
 O maua pu no i ka po nei.

HUI:—Nawai e loa ka'u ia iala,
 Ua makia paa ia i ka iwi,
 Ua hipuupuu maua i ke aloha,
 A ka pane poo i kuu mawana.

Kilikilihune lau Opukele,
 Ka anoi ke hiki mai,
 Me he kanaka ala ke aloha,
 Alo ae no oe noho mai ana.

Owai ole hoi au li'a ilaila,
 A he welo mikioi na Liu-a.
 Ilaila no oe hoolailai,
 Na-e iki Iao i ka Uhiwai.

J. H. PEKINA.

BUKE MELE HOONANEA.

KA HAE KALAUNU.

Kaena ka wahine o ke Kuahiwi,
Kuko i ke ao opua i ka lani,
Lalau hopu i ka mea i li'a ai,
I kahiko no ke kino e nani ai.

HUI:—O ka wehi Kalaunu o ke Aupuni,
No na lani eha i ka Moku,
No lakou nei Hae Kalaunu,
E mau loa kona welo ana.

E noho malie oe ilaila,
Kou kuleana kupono iho no ia,
Mai noho a kii ae i ke kapu,
No na mame ia a Keaweahenu.

No Kalani Kaulilua i ke anu,
No aia i Kaala ke kino a ke aloha,
No Liliu o Lolokulani i ka maka,
No Pili aloha ka ua me ka makani.

LILIU.

KA ANOI.

Mai hoonioni mai oe,
Ka pili aloha a maua,
Elua wale no maua,
Me ka nui manu o ka lewa.

HUI:—Paa ia iho ko makemake,
Koolua nou o ka po.
Kou kuleana paa no ia,
Ko lihilihi i anoi ai.

Mai punihei hewa oe,
I ka nani o Ainapo,
Eia iho no ka anoi,
Me ka la malamalama.

Mai kuhihewa aku oe,
I ka ula o ka Ohelo papa,
O kou makamaka no ia,
Ke aloha i palua ia.

Haku ia e LUI, Leo Mele ELIZA.

KE ALA TUBEROSE.

Auheā wale oe e ke ala Tuberoſe,
 He moani aala i ke ano ahiahi,
 Ua like me ka lau vabine,
 I ka hoene i ka poli pili paa.

HUI:—I ke hou ana i ka nani o Hilo,
 I ka uluwehiwehi i ka lehua,
 Lei hooihi a ka malihini,
 Mea ole i ke kono a ke aloha.

E aloha ae ana i ka makani Puulena,
 Ka makani kaulana o ka aina,
 Home noho a na Iiwi Polena,
 Mea ole i ke kono a ke aloha.

J. AEA.

PILI PALUA.

Kahiko ka nani i Lihau,
 I ka hale hinano a na manu,
 He paia aala ko kuu ipo noe,
 Ke ike aku oe hooihi.

HUI:—O lili wai aloha a ka ohelo,
 Ua like a like ka anoi,
 Mikioi ka liko o ka lehua,
 Ke aloha i pili palua ia.

Kaohi ke aloha pee maloko,
 Pulu i ka ua Ulalena,
 I walea ia uka iuiu,
 Lamalama nu'a o ka palai.

Aohe hana a ka opua,
 Elieli kulana ilaila,
 Hoolai ka nohona a Wewehi,
 Me hoonoeneo i kuu poli.

AHI WELA.

Kuu pua i li'a ai,
A'u i kui alawa,
I lei hoochiehie,
No ke ano ahiahi.

HUI:—Ahi wela mai nei loko,
I ka hana a ke aloha,
E lalawe nei i kuu kino,
Konikoni lua i ka puuwai.

Elua no maua,
A i ike ia hana,
Lai ai ka nanea ana,
Hooipo i kuu kino.

LIZZIE DOIRON.

HALE OLA.

Auheā wale ana oe,
E ka iini a loko,
Na loko ae ka manao,
Hu'e lani i kuu kino.

HUI;—He halia kai hiki mai,
O kuu lei onaona,
Ua pulupe i ka ua,
Ka nokea eke kehau.

He aloha ka awapubi,
Ka nani oia home,
Honi hoomau i ke ala,
I ke onaona oia uka.

Hooihi au e ike,
I ka nani o Haleola,
He ala no ia pua,
Ua ona ia e na manu.

J. C.

KA OIWI NANI O KE KAMAKAHALA.

I ke ahiahi Poakolu,
 Kuu ike ana iho,
 He elele waha ole,
 E i mai ana ia'u.

Hui:—E i mai ana, e i mai ana,
 Aia ke ala i kanahale,
 Kahi i walea ai,
 I ka nani o ia uka.

A he nani io no ia pua,
 Me he la'i pala ala ka memele,
 Ka oiwi nani o ke Kamakahala,
 Lamalama i ka uka o Lanihuli.

KUWILI IHO AU.

Mamina wale hoi au,
 I ka nani liko o ka pikake,
 I hoa hoawahi maka no'u,
 No ka pee poli o ke ano ahiahi.

Hui:—Kuwiliwili iho au,
 A he mapu maoli no,
 O ka hanu aala o kuu ipo,
 ||: Kuwili o ka pili aumoe :||

O ka waimaka pu me oe,
 Kamau pu aku me ka ihu,
 Good bye pu kua,
 Oiai ka pilina ua la,

Hooniponipo iho au e moe,
 O'eo'e ana ko iala kuli,
 Kuhi au la o salia,
 Kuu hoa hoonipo o ka po.

Ahi wela mai nei loko,
 Lauwili i ka iwi hilo,
 O ka hana ia a ke aloha,
 O ka hue pau i ka waimaka.

WAI O KANEWAI.

Nani wale ka nohona a Liliuomoku,
I ka malu olu o Kauikalani,
O ka nihi a ka ua Lanikea,
I uka o Waiohiumalo.

HUI:—Kohu hone a Anapau,
Kahi wai o Kanewai,
I ka Pehia e ka hunakai,
Kai nehe i ka iliili,

Ka nanea ana iho ua lai,
Nihi koke ka makani Lauawa,
Hoolailai i ka piina pali,
Ka'u ia e ike nei.

Alau ko'u uluhua,
I ka poai a ka ua Onini,
Ke hoohelo ae la i Punahoa,
Omaka nalu o Keanini.

J. A., H. A. me M. K.

KE ALA ILIAHI.

Kuu pua lei lehua,
A'u e li'a mau nei,
Hoopaa ia iho ke aloha,
I kuleana pu ai kaua.

HUI:—Kuu pua kuu lei onaona,
I kui alawa ia nei,
Me ke ala pua Iliahi,
A he hoa pili no ke aloha.

Ko leo ka'u aloha,
E nahenahe mai ana,
Hoolanalana ae ana,
Puuwai kapalili e.

Ua hiiwale i ke aloha,
A loko e hana mau nei,
Noho oe ilaila a manao mai,
Hoi mai kaua la e pili.

J. C.

LAU ONAONA.

Eia ianei ko lia,
 Ko lei e ka lau onaona,
 Hiipoi ia iho ka welina,
 I waiwai na ka puuwai.

HUI:—E kuu aloha e maliu mai,
 A ka makani e lauwili nei,
 Eia au la ua anu,
 Ina kiheahea a ka wai.

Hookahi waiwai nui,
 A ka manao e lia nei,
 O ka ike wale aku paha,
 I ka hiona ka manao.

PILI KAPEKEPEKE.

Kohu ole ka ua i uka,
 I ka hoowaha i ka wao,
 Ua pau kou palena,
 Na la mua o ka makahiki.

HUI:—Ua pono no kau hana,
 A he mea waiwai,
 Eia mai no e ka ole,
 A he pili kapekepeke.

Ua pono no kau hana,
 Ua eo ka pili ia oe,
 E ka lio keokeo puakea,
 Nana e kainepeu nei kula.

E aho ka hoi i ona,
 No ke kialua waiwai,
 Nana e pailaka pono,
 Kau pono ka ihu i ka makani.

EHUKAI OKATOBA.

Aheahe—lai ahiahi,
 Haukololio—i ka makani,
 Hoolale ana e ka ehukai.

HUI:—Pehea hoi kua,
 I ka hoolale a ka ehukai,
 E naue e hooko,
 I ka hoolale a ka ehukai.

Ka pa'e—kai hiki mai,
 Ka hapahapai—a Anahulu,
 Hoolale ana e ka ehukai.

MRS. ELIZA HOLT.

BEAUTY.

Onaona wale kanahela,
 Luheluhea i ka palai,
 Aole nae e like aku,
 Me ka hanu o ka Lupine.

HUI:—O Beauty ko'u hoa like,
 Kahi manu kiko pua lehua,
 Alo ana i ka nui o na manu,
 Pulu i ka wai a ka noe.

Ua hele a nohenohea,
 Lupelupea i ke ala,
 Aole nae e like aku,
 Me ka hanu aala o Lupine.

Lau lii ka lau o ka Maile,
 Lauae o na pali,
 Aole no e like aku,
 Me ka hanu aala o Lupine.

IKE IA PELEKANE.

Nani wale hoi kuu ike ana,
Kela aina kamahao,
Aina kaulana i ka nani,
Ka ikaika me ka hanohano.

HUI:—Ilaila kuu upu kuu lia,
Ka manao nui e waiho aenei,
O ka ike lihi aku ia Pelekane,
A he nani ia, ae, ua hiki no.

Kuko no loko a hooko,
E ike i na pua i ka wekiu,
Honi ka makani olaila,
I ka hahi welelati i kuu papalini.

LILIU.

PUA ILIAHI

He aloha kuu pua Iliahi,
Onaona wale o kanahale,
Hoa alo o ke anu hui o ka palai,
Pukui o ka lau naenae.

HUI:—He halia pau ole keia,
No ke onaona waiianuhe,
Ke hea mai nei ka anoi la,
E uhoi maua e pili.

Aole no he mea e like ai,
Me kuu lei liko Iliahi,
I popohe i ka ua noenoe la,
O ka uka lihau o Malama.

Malama ia iho ke aloha,
I kuleana like ai kua,
Kua pu no i ka piko la,
Wai olu i ka liko o ka lehua.

KAHIWAHIWA.

HOOLALE O KA UKIU.

Aloalo kehau o nei mea he anu,
 Hoolale o ka Ukiu,
 O oe ko'u lua lai ai ke kaunu,
 Hoolale o ka Ukiu.

HUI:—Ka owe o na bele,
 E honehone nei,
 Kou leo nahenabe,
 Hoolale o ka Ukiu.

Auhea wale oe e ke Kulaokahuā,
 Hoolale o ka Ukiu,
 E kuhi ana au e lai na iwa,
 Hoolale o ka Ukiu.

PUA SADINIA.

Auhea wale ana oe,
 Kuu pua Sadinia,
 I pulu i ke kehau,
 O ke kakahiaka;

HUI:—I never will forget you,
 Gentle bow that you gave me,
 Eia no me a'u,
 Kahi konikoni ai.

Noho aku au hoolono,
 Ka owe nenehe a ka wai,
 A he waiwai nui ke aloha,
 A loko e hana nei,

O ka nee mai a ka noe,
 Halii mai la i uka,
 I hoopulu i ke kehau,
 O ka malu Hekuawa.

KUHALAHALA.

Uluhua, uluhua wale hoi,
 I ka ua noenoe liilii,
 E hana mau mai nei,
 Mania wale i ka lihi,
 Aohe lihi hoihoi,
 Ka manao kakahakaha,
 E hoolai iho ka pono,
 I ka olu o Wehilaulani.

Hui:—|| :Hiki kuhalahala ole,
 I ka lino hau malie:||

Auhe a wale ana oe,
 E ka manu Iwa hoohe,
 Hoohialaai mai nei,
 Ko'u ana ia nei,
 Aohe wahi o ke kohu,
 A loko e ne ae nei,
 Ua lawa au me i nei,
 Me ka eu Kaapunihonua.

Hui: || :Hiki kuhalahala ole,
 I ka lawelawe malie: ||

A he keu ko'u hauoli,
 Ka pipii lani a ka manao,
 Ke halakau ae nei,
 Hoio i ka pili a loko,
 O loko iki hana nui,
 Hoonowelonowelo i ka ii,
 Heaha la ia i ka uhene,
 Kahela i ka heno a hoohe.

Hui:—|| :Hiki kuhalahala ole,
 I ka milimili malie.

KUU ALOHA E MALIU MAI

E kuu aloha, e maliu mai,
 Eia au la i ka poli,
 I ke kiowai o ka onohi;
 Puiwa i ka ike ana i—ho;
 Kau ana ka hiona—la,
 Ka inuwai a ke onaona,
 Puiwa hikilele i ka leo,
 I ka ike ana i ke aloha.

HUI:—Kuu Maka i Ponia,
 Kuu Maka i Ponia,
 Puiwa hikilele i ka leo,
 Kuu Maka i Ponia.

He aloha ke ao a ka Ia,
 Ilaila ko kii onohi,
 I mai ana ia'u e hoi,
 Puiwa i ka ike ana i—ho;
 Kau ana ka hiona—la,
 Ka inuwai a ke onaona,
 Puiwa hikilele i ka leo,
 I ka ike ana i ke aloha.

He mea nani ka ikena i ke aloha,
 E ui mai ana i ke ala e hoi,
 He lei he papa no ia home,
 Puiwa i ka ike ana i—ho;
 Kau ana ka hiona—la,
 Ka inuwai a ke onaona,
 Puiwa hikilele i ka leo,
 I ka ike ana i ke aloha.

MILIHAI PUA.

Ilihia wau la,
I ka hea a ka waiolohia,
E hoi ae kaua,
I ka malu olu o ke kukui.

Hui:—E li'a wau la,
I ka po kehau lailai,
No milihahi pua,
E pohea mai la i ka iu.

Kui ia iho hoi,
Ko lei e ka lau onaona,
I koolua nou,
Me ka ua o ka holio.

KUU HOA I HALEMANO.

Ke naue ae nei e ike la,
I ka ehukai o Puaena la,
Ia kai a maua i alo ai la,
Me kuu hoa i Halemano.

Hui:—E-o e lipo i luna,
Lehua i Halemano,
Hoonana ana la,
Ia uka o Waialua,

O ka noe mai a ka ua Kiowao la,
Me ke one wali o Maeaea la,
E nopa mai la i ka lihilihi,
Noe hali a ka ehukai la,

E aha ana oe e ka upu la,
E hooheho nei i ka opua la,
He wehiwehi mua no ia nou la,
Ua kupa i ke anu iuiu la.

Me oe ka anoi e pili ai la,
E lawe ae a milimili la,
O ke aloha maloko iho ia la,
E haupuupu ai i ka anoi la.

MRS. ELIZA HOLT.

WILIWILI WAI.

E ka wiliwili wai,
Koiawe i ka lai,
A heaha kau hana,
E nawe malie nei.

HUI:—E-i nei, e-i nei,
E poahi mai nei,
A hea, a hea,
Oe kaohi mai.

Oki pau o iala,
Ua ninibi ka lawena,
Kuu iki iho hoi,
I inu aku au.

WAI PUNALAU.

Malihini ko'u ike ana,
Na ka nui kono a ka manao,
Auau i ka wai kaulana,
Wai poai olu o Punalau.

HUI:—Lipolipo ka wai o Punalau,
Wai hooihi a ka malihini,
Kuu aku ilaila kuupau,
Ne olu i ka noe halii.

Powehi oe ke ike aku,
Luhiehu nolu i ka palai,
Ua wehi nu'a i ka lehua,
Ka houe wai la o Punalau.

Na wai e ole ko'u hoonipo,
Ua laahia i ka makemake,
O ka iho makawalu a ka wai,
Hunehune wai o Punalau.

MRS. ELIZA HOLT.

KUU IPO KUU LEI.

Haliaia mai ana ia'u,
 Me he ala e hiki mai ana,
 A hiki mai oe olu iho au,
 Hoi pono iho nei puuwai.

HUI:—Kuu ipo kuu lei,
 Kuu milimili e,
 Hoi mai no kua,
 Hiipoi pu i ke aloha.

O ke aloha kau e malama,
 Hii ia iho ma ko alo,
 Pili ia ma ko poli,
 I hoa nou e ka lia.

LIZZIE DOIRON.

PUUHUE.

E maliu ae au i ka leo a ke aloha,
 E hea mai nei e hoi aku,
 Me a'u ka anoi e kipa mau ai,
 Ma neia pohai anuheia.

HUI:—Nani wale ka uka la i Puuhue,
 I ka holu a ka lau laau,
 O ka pa a ka makani apaapaa,
 Koiawe i ke ahe malie.

O'u hoa i ka uka o Puuhue,
 Ua luhea i ka ua lihanu,
 A luhe lai i ka uka iu,
 I ka wiliokai a ka ua,

He nahele ulu wehi ka lehua,
 He anu i ka iu naele,
 Nipo aku ilaila hooipo,
 Olu nae i ka lau o na maile.

He iniki aloha kai hiki mai,
 Kaomi i manua ka lehua,
 E kala hoi ko'u hooihi,
 O ka hea mai a ka leo a ke aloha.

MRS. ELIZA HOLT.

NIHOA.

Kahiko ka nani i na kuahiwi,
 Ka ohu hali i na pali,
 He pali kapu ki kilakila,
 Ma-pu ke ala me ke onaona.

HUI:—He alii he wohi keia,
 E hiipoi ia mai nei e ka hui Nihoa,
 Kohu wai mapunapuna,
 E pu-a ae nei i ka puuwai.

Ia nei pu mai kaua,
 I ke kui pua lei alii,
 I wiliā pu ia me ke aloha,
 Na hoa o ke kai i Nihoa.

MAKALAPUA.

O Makalapua ulu mabiehie,
 O ka lei o Kamakaeha,
 No Kamakaeha ka lei na Lia wahine,
 Na wahine kihene pua.

HUI:—|| :E Lei hoi, E Liliulani—e :||

Haihai pua Kamani Pauku pua ki ki,
 I lei hoowehiwehi no ka wahine,
 E walea ai i ka waokele,
 I ka liko i Omaonahela.

Lei Kaala i ka ua a ka naulu,
 Hoolue iho la ilalo o Haleauau,
 Ka ua lei Kakoo-ula i ke pili,
 I pilia ka mauu nene me ke kupukupu.

Lei aku i na Hala o Kekele,
 I na hala moe-ipo o Malailua,
 Ua maewa wale i ke ōho o ke Kawelu,
 Ka lei Kamahala a ka ua Waahila.

PUU O HULU.

O ka loku hala ole,
A ka ua i Maili,
Ili hewa ka manao ianei,
Ka waiho lahalaha i ka lai.

HUI:—O oe kai huia i-ho la,
Ka manao e puapuai ala,
Eia'e o Puu o Hulu,
Hulu no au ua hiki no.

Na'u i lahui i ka leo,
Ike i ka makani Kaieulu,
Ka makani o ka aina,
Haila hoolai na manū.

MRS. ELIZA HOLT.

NUHOU.

Ilihia wale hoi au,
I ka nuhou kakahiaka,
Kau ka weli kau ka opua,
I ka wanana heno aia manū.

HUI:—Ua hiki no, me a'u,
Kuu lei mae ole he aloha,
|| Ua hipuu polena ia,
Ua holoponō ne i ka makemake :||

Me oe ka haupu ka halia,
Me ka nae o water lilly,
Onaona ia pua ohaoha i ka wai,
I ka hiki pa a ke ala.

Aheahe ka hana a ka opua,
Haaheo mai la i Waolani,
He lani pa'u ke aloha,
E hoonaele nei i ke kino.

Haku ia e KATY HAVY, Leo Mele ELIZA.

HULUPALA.

Kuhi ana no paha oe,
 He iki kaamola mai nei,
 Ua hilo kaa kolu ia,
 Pau kauna o ka noonoo.

HUI :—Neenee mai a pili,
 E ka ihu o ka makamaka,
 Na'u e nowelo aku,
 Halakau oe i ka lio hulupala.

Mai kaena hewa oe,
 He ike hanahana poahi,
 Eia mai Laumiki,
 O ka puhi noii nowelo.

KAWAIKINI.

Holomapu ke ala Lauae,
 Lawea mai e ka moani,
 Aloha ke kapa huki-palai,
 I ka lupea e ka ua Haao.

HUI :—Noe mai la Waikini,
 Kahela Haupu i ka olu,
 Anu lipo Waiopua,
 O ka ipo huna i kanahelo.

Lei oiwi hiilei,
 Loli i ke aloha,
 Ke aloha haupuupu,
 E haupu nei ianei.

Me oe aku ia unu,
 Luuluu au i ka mili,
 Hiipoi ia ka welina,
 E liliwai Ohelo.

LAU AHIHI O LIHUE.

I anoi aku au e ike,
Ia lau ahihi i ke kula,
Ke luhe mai la i na pali,
I ke kula anu o Lihue.

HUI:—Anu au anu au eke hoa,
Ina kulu kehau a ke anu,
Ke lelehune mai la iuka la,
I ka lau lipo o ka palai.

Hoolono ae au o ka nehe,
O ka ua nihi lau kukui,
Ke loku mai la i Maili,
I ka lau o ka pilipili.

KA LAMA AE ONE.

Auhea oe e ka lama ae one,
Kaua i ka pahupahu Bilioki,
Ua nani ka waiho mai a ka papa,
Koke na ulu i ke kahua.

HUI:—Ua pass long ia kau puu,
Never see me hoi ka'u blind,
Ua ike ia aku oe,
A he hele pulapu mai kau hana.

Kau kapakahi aku oe i ka Ulu,
I ka welelau mio o ke kiu,
I loa e ka ulu i ka naele,
Kusini ka loa la e ka lima.

Hoiho ko kiu a aulii,
I niniu pono ai e ka Pelekane,
O ka'u kiina no ia,
Huikau na ulu la i ke kihi.

O-ua ilio me kala ole,
Ke kai huluhulu ia ae nei,
Aole no oe e pakele aku,
A he hapaha Pelio.

HUI NIHOA.

Eia no makou,
 Na hoa hui Nihoa,
 I lawea ia e ke aloha,
 Hoa alo o ke kai loa,
 Lai pohai ana manu,
 Makaikai a ka lani.

Hauoli na manu,
 Ahe la nui keia,
 Kau ka malu o ke ao,
 Kahelahela ka pua lehua,
 Lai o na kuahiwi,
 Kuahiwi ku kilakila.

Kilakila na Mauna,
 Hoope ia e ka naulu,
 Ulu ae nei ka manao,
 O ka lani a makou,
 E mau kou hiipoi ia,
 E ka hui Nihoa.

IHIIHI I KA WEKIU.

Ihiihi ka pua i ka wekiu,
 I ke kaomi ia e ke kehau,
 Hui ai ka nohona o ka wao,
 Ia uka puia i ke onaona.

HUI:—A heaha ka hana a ka palai,
 E luhe mai la i kanahela,
 Hele no oe a ike mai,
 E mahie luna ua li'a loko.

Kuhi ana oe na hai e kui,
 Ia pua ono o ka lehua,
 Na ia pua au i hoowalea,
 Ike i ka wai o Namalokama.

Kama ia ke aloha i paa loko,
 I nakamaka no ka halia,
 I halia aku au e ike,
 I kuu pua i ka wekiu.

LIPOA AALA O LELE.

Ua noho au malalo o ka olu,
 E wālea ana i ka olu oia pua,
 Mapu mai ana ke ala o ka lipoa,
 Ua eha au mamuli mamuli o ko leo,
 Kupaoa wale no ko ka hala,
 A he hui mau ia nae e ka waiānuhea,
 Hoope ia i ke kupukupu moani,
 Aohe mea like me ke ala o ka lipoa.

HUI:—Ua noho au malalo o ka Olu,
 E walea ana i ka olu oia pua,
 Mapu mai ana ke ala o ka lipoa,
 Ua eha au mamuli mamuli o ko leo.

O ka noe a ka opua i kanahēle,
 Kilihune i ka liko o ka ieiē,
 Aohe mea like malalo o ka malu Akolea,
 Ihiihi kapu i ka leo o ke kahuli,
 Hookahi waiwai o ke onaona,
 O ka honi vabine he mau ia,
 A he lono leo ka'u i lohe,
 Ku ana ka elele a ke aloha.

Anoi aloha ia iu anō,
 Pohina mai la kanahēle i ka ua,
 He ala moani lauāe i na pali,
 Poni ia e na kulu kehau o ka po,
 A he nani pua Laniuma,
 Aohe mea like me ke ala o ka lipoa,
 Kahi a ke aloha i hiolani,
 Ua eha au ua lia ia oe.

ANAHULU.

Kehakeha ka uka i Helemano,
I ka nua lehua i kanahela,
Lea wale ka lalahela a ka wai,
Koikoi ana ia'u e naue.

Hui:—Aole au e puni ana,
Kahi wai o Anahulu,
Nene lili nei i ke one,
I ke one wali o Maeaea.

A he hoope ka ka ua,
I ka ehukai o Puaena,
E pafele ana i ka noe,
Hoohaihai mai i ke kula,
Aniani mai ana ka makani,
O kuu aloha paha ia,
O kuu ipo aala i ka pili,
He onaona hanu i ka poli.

MAI HOEUEU MAI OE.

Auhea wale ana oe,
Uhiwai o Kaala,
I pili me ka Malua,
Ka makani o ka aina.

Hui:—Mai hoeueu mai oe,
I ka wai ua lana malie,
E kakali malie oe,
A lai pono ka makani.

Hookahi a'u mea uluhua,
Ka makani anu la he kiu,
Houhou ana i ka ili,
Konikoni i ka Iwihilo.

Aole i piliwi ia,
Leo hone o ke kahuli,
Hone ana i ka po lai,
I ke kulukulu aumoe.

ALOHA' NO LILIA.

A heaha ka hana a Malulani,
E noho mai nei i ka wehi,
E kaunu ana paha me Hiku,
I ka piko o Hualalai,

HUI:—Mai alai oe i ka pili ua lai,
Oiai ka manao i kuu kino,
Ua malu hoi au i ka leo,
Ua kupa i ke anu oia uka,

Me oe ka anoi e pili ai,
E ka milimili lei mokihana,
A o ka'u hana mau no ia o ke aloha,
I hoa no ka iu anoano.

HE INOA NO KALELEONALANI

Nani wale ke kai o Manolau,
Ke hone ae la i ka hinahina,
Hina kuu manao ia oe,
I ke alai a ka ua noe.

HUI:—Ahea la wau e hoi aku, hoi aku,
I ka wai anu o ka Aina,
I ka wai huihui i ka Ili, i ka ili,
Ke hui ae nei ka manao.

Pehea ka ua o Hanalei,
Ke kapeku ala i ka Hinano,
Kii kuu maka kalohe i ona'la,
Hikilele au me kuu hoa.

He hoa i ka ua o Eleao,
Kaua panehala o Maluaka,
Kanahela kiwai o ka ua,
Ka Ahuihala ka makani,

Lolii ihō la pulu elo i ka ua,
Ka Okai pola ka hinano,
Ke kino haimalule i ke anu,
A malailua e nonoho nei.

AINAHAU.

Na ka wai lukini wai anuheā o ka rōse,
 E hoope nei i ka liko o na pua,
 Na ka manu pikake manu hulu melemele,
 Na kahiko ia o kuti home.

HUI:—Nani wale kuu home o Aina hau i kā iu,
 I ka holu nape a ka lau o ka niu,
 I ka ulu wehiwehi i ke ala o na pua,
 Kuu home, kuu home i ka iuiu.

Na ka makani aheahe i pa mai makai,
 I lawe mai i ke onaona lipoa,
 E hooipo hoonipo me ke ala o kuu home,
 Kuu home, kuu home i ka iuiu.

KAPILI.

CHARMING IPO LAULII.

E Darling i ka Uluwehi,
 Eia ka manai ka iini lokuloku,
 Ua hiki ka halia lipo anu,
 Me oe aku hoi ka puana a ka moe.

HUI:—Oh! Delerious ke ala,
 Huihui of my dear,
 Charming lovely ipo laulii,
 Ka sweetest of my eyes.

Auheā ka halia anuheā,
 E haupuupu nei i ka lai,
 No Charming ipo laulii,
 Kuu ipo laulii a sweetest of my eyes.

Mino aka i ka unu Olaa,
 Lawe oki ke aloha ia nei,
 Kuihe iho Waialeale,
 Lai ai Charming ipo laulii.

PUA NANI O HAWAII.

Ua lai no ke aloha,
O ka li'a ia a ke kino,
Pau ole ko'u manao,
Ke'ala o kanahela.

HUI:—Auhea wale ana oe,
Pua nani o Hawaii,
Nani wale kuu ike ana,
Na lehua o Hoolai.

O ka noho a Robine,
Iwa aulii o ke anu,
Aole na e pakele,
I ka liilii Iliahi.

Ke ala ka'u i honi,
Poai na Mokupuni,
Hiki pu me ke aloha,
Ilaila ko'u mahalo.

I ka pua o ka mokihana,
Onaona mapuna hanu,
A'u i honi hoomau,
Hu mai nei ke aloha.

Kahi wai o Hoohila,
Kela wai kaulana,
A ka manu e inu ai,
Wehiwehi wale ia uka.

I ka lipo o ka palai,
I wilia pu ia me ka hala,
Kuu lei iwa i ke anu,
Huli e ke alo la i Lanihuli.

HOALU KIPUKA ILI.

Kuhihewa au o Nanea
 I ka hooheho ana mai
 Eia ka o Heinaianau
 Ka puni hana nowelo.

Hui:—Ilihia wale hoi au
 I ka hoope a ka lauawa
 Me he la o kuu ipo
 Hoalu kipuka ili.

Akahi au a ike maka
 I kahi elepani kupua
 Ua kohu no oe a kohu
 Me ka aukuu kiai loko

Hana ia a lawa ko kemakema
 Oi ma-lo pono ke kaula ili
 Eia iho kahi malailua
 Me ka apowai o Kalahiki.

LOLENA.

NANI HAILI PO I KA LEHUA.

E o e Liliu i ko inoa,
 Nani Haili po i ka lehua,
 Noho ia kula i ke onana,
 Honi ke kupa i ke ala.

Hui:—Waiho u no i ka poli o ka ipo hinano,
 Nana aku he nani wale no kanahela,
 Ilihia okoa i ka maikai o ka pua,
 I kui au a hoolawa i ko aloha.

E o e Liliu i ko inoa,
 Nani Kilanea paa i ka noe,
 Po luna o Uwekahuna i ke ala,
 Nalo aku la na lehua nee i ka papa.

Hui:—Ike ole au i na hala o Halaanianī,
 I ke alai ia mai e ka ua nahunahu,
 E ake au e hoi mai Kapuulena e pili,
 E moe aloha maua me ka moani.

SUNDAY MANOA.

Nani wale no oe,
 Mahina kau ahiahi,
 Hooheho nei i Lehua,
 Ua hiki ka halia,
 Ua liko i ka nohea,
 Me oe aku ka puana,
 O ka moe.

HUI:—Kui ia ko lei
 I koolua no ia uka,
 Ia uka iuiu,
 Lanakoi a ka makemake,
 Hoope ia
 E ka ua Tuahine.

Eia ka anoi,
 I poni ia,
 I kuni paa ia e ka iini,
 He iini kau nui,
 A ka mana'o,
 He halia hana mau,
 Ia loko.

Haupu hikilele mai au,
 I ka hone a ka wai,
 O Pualoke,
 Hookahi waiwai,
 O ke kuleana no ia,
 Ka Puana a ka moe,
 Ka hale kipa.

MRS. ELIZA HOLT.

MAGNOLIA.

Hoomahie luna ua li'a loko, ua hiki no,
 Ua lawa ke koi a ka ipo, ua hiki no,
 A huli e ka i'a lai na manu,
 Halakau na makau a ka liko, ua hiki no.

HUI:—E ka maoli pua magnolia, ua hiki no,
 Hoonoona o ka uka iu, ua hiki no,
 Homai no'u ke ala huihui,
 I hoa hooheho no ka liko, ua hiki no.

Kiekie ka nani i kuu maka, ua hiki no,
 Ke kilohi iho oe hoohe, ua hiki no,
 Hoonoeneo na maka la o ka opua,
 I ka hene wai ono a ka liko, ua hiki no.

O oe ka'u lai ka pilina, ua hiki no,
 Haihai olelo o ke dawn, ua hiki no,
 Haina ia mai ana ka puana,
 O ka pua i ona ia e ka liko, ua hiki no.

MRS. ELIZA HOLT.

MOAULA.

Pau ole ko'u hoohehe,
 I ka wailele o Moaula,
 Ilaila wau la ike,
 I ka wai pahihahi i na pali.

HUI:—He aloha kuu lei Pikake,
 Na'u i kiss a hoomau iho,
 E lei no au i ko aloha,
 Remember be sure and be there.

Aole i pau ka iini,
 Ke kuini la o na pua,
 Ua hele wale a nohonohea,
 Lupalupa i ke ala.

Weliweli aku hoi au,
I ka poai a ka opua,
Hoohaehae naulu,
I ka pakalikali mahope.

A kahi hoi au a ike,
I ka pohu lai a Kamanu,
I ke kai malino i kuu maka,
I ke one holu o ka Miloloa.

KAMAKANI LIHAU PUA.

He makani lihau ko Puna,
Halihali mai ana i ke ala,
Kaua i ka papa haaleale,
I ka newa ka ao o ka hala,
Ilaila ka anoi e lia nei,
Kupu ai ka manao ne ho-a iloko,
Aia hoi ha ua mea e nani ai,
O ka hana pau ole a ke aloha.

HUI:—E o e ka lei o Hawaii,
E ka pua hiwahiwa a ka makua,
A he lei mililani na ka manao,
Eia iho hoi e lei e.

Ka manao hone i ka manawa,
I hoihoi ai ke kanaka i ka leo,
Ke nolua-e-la i ka ua noe,
He ua hana nawele i ke pili,
Pulu iho la ka maka o ka lehua,
Na lehua i kanahale i Paieie,
I hoohuoi hoi oe i keaha,
Ua lawa a lawa ke aloha, me oe.

KAHIONA A NA MANU.

Nani wale ka hiona oia manu,
 Hiehie i ponia e ke aloha,
 Ilaila lawa kuu makemake,
 Honi au a hoomaumau.

HUI:—A pili ka'u manu hulu nani,
 Ia manu Iiwipolena,
 Ua pili i ka'u kepau,
 I ka'u kawili ana i mamau.

Noe mai ana ia'u ko aloha,
 Kohu ao opua makani,
 A he anu ka makani o Inuwai,
 I mehana hoi au i ko poli.

KAINUUALA.

LIA I KA WAI MAPUNA.

E hiai hiai ae ana,
 I ka nani o Maile-kaluhea,
 Ua lohia e ka ua koiawe,
 E ka ua noe mai i ke pili,
 Hoiho kaua e Welina,
 Oiai ke aloha ua paa,
 Ua kila ia me ka manao,
 Ua kupa i ke anu oia uka,

HUI:—Auhea wale ana oe,
 E li'a i ka wai mapuna,
 E nohenohea pua o ka lama,
 E ka lihilihi o Anehila.

Aohe hana a ka opua,
 Ua lai luna o Malamaniu,
 Ua olu i ka wai a ka naulu,
 I ka wai ua lana malie,
 Kilakila kulana oia kini,
 Hiehie i ka uka waokele,
 Onaona ke ala lauae,
 Ka'u ia e honi nei.

KA HANU O EVALINA.

Homai na'u e honi aku,
I ka lau aala vabine,
He moani lau liili,
Ka hanu o Evalina.

HUI:—He anoi au e honi,
I ka nae aala o vabine,
He moani lau liili,
Ka hanu o Evalina.

Hii mala anu ke aloha,
Ke hiki mai nei welawela,
Ua luhi au maopaopa,
He pali kiekie kelakela.

He uwila hiki aumoe,
He pakuikui ooloo,
He kulana mapuna hoe,
Kunewa i ka nui o ka holo.

Ua holo ka'u kaona,
Ua ike ia e ka nui manu,
Hookahi no hailona,
Ka puia aala o ka hanu.

FIGGS.

KE KO MAI NEI KE ALA.

Auheha la kuu pua lei,
Omau-i-ke-onaona kona inoa,
Ua noho wale i ka lai,
A nohea ke ike aku.

HUI:—Ke ko mai nei ke ala,
Ke ko mai nei ke ala,
Ke ko mai nei ke ala huihui.

Pulupe a koekoe,
Ka ua noe kilikilihune,
Nana hoi i alai mai,
Paa mai ke ala e hiki aku ai.

O ka mahina opulepule la,
 Ke welo ala i ka ilikai,
 Pehea ia e apa nei,
 Eia'e o makani kona.

Na ia la eu hoouluulu,
 Na ka pua iu la o ka waokele la,
 Ihiihi ka pua oiala,
 I ka leo, hoochiehie.

O ke kani hone a ke gita,
 Hoolai ai la hoolana,
 Aneane kupilikii,
 Ka leo o na manu.

HE INOA NO KAPILI.

A ka luna hoi au o Lehua la,
 Ike i ka nani o Haehae,
 Ilaila ike i ka wai Puilani,
 Ka lalawe malie i ka lai.

HUI:—Ai hewa a i lawe nui ia la,
 Kuu aku oe i ka nahenabe,
 O hemo e kapili paa mai la,
 Hooko i ke kuleana a ke aloha.

E aloha ae ana i ka wai koiawe,
 I ka lelehune mai i ke pili,
 E pili kaula oiai ke aloha,
 Koolua o kahi mehameha.

Ua nani no oe e ka Iwi Polena,
 E ka manu kiko pua o ka uka,
 Eueu puapua niniu poahi,
 Ka lawena malie a ia nei.

KUHAIMOANA.

Nani wale no kuu ike ana,
I ka aina o Kuhaimoana,
Aina i ke kai lipolipo,
Hookala kupueu o ke aloha.

HUI:—Puiwa ana hoi au,
Ia lilii wai o Lehua,
Uluhua wale au i kahi manu,
I ke kiki koni koni koni i ka pua.

Sweet kuu ipo aloha e hoi ea,
Lihilihi lehua o Makaanoe,
Ua pulu elo wale i ka ua,
I ke kualau la he kiu anu.

Nani Venusa ka hoku kau ahiahi,
Bright star a ka puuwai e li'a nei,
Lady love hoopili o mi nei,
Kiss me darling say not farewell.

HOKU BOYS.

Aluna hoi au o Halai Hill,
Huli nana ia Kaiwiki,
He iki ko leo i ka pane ana mai,
A hiki aku au ilaila,

HUI:—E uleu kakou na Boys o Hoku,
Na Ladies mai hoi kui lima,
Hoolono aku hoi o ka pane ana mai,
Swing your partners Hoku boys.

Ilaila ka anoi a kuu puuwai,
Waiwai nui oe na mi nei,
O you ka'u darling e li'a mau nei,
I ke ano o ke kuluaumoe.

Moe aku hoi au a hoolono,
O ke kani a ka pio i ke kula.
Kubihewa ka manao o oe hoi ia,
Eia ka aole.

HE INOĀ NŌ LIKELIKE.

Aluna au o Kaiāiki,
 Hone ana ka leo o kuu Iwa,
 Kuhi au o ke ao nāulu,
 I ka hāliālia ana māi,
 Ka opua ka'u i ike aku,
 E kau ana i ka ilikāi,
 Akahi a lana ka manao la,
 E uleu ana au me iāla.

Hui:—O oe ka ia e ka nāulu o ka lewa,
 E hone nei i ke alo o ka opua,
 Kuhi au o ka liko jihilihī o kanāhele,
 Ka awihī wihī ana māi e uhoi ae kaua.

Oiala ka liko i ike ia,
 O ka libilihī o ka lehua,
 Ua ane like no me Hiku,
 Keiki a wali kanāhele,
 Aluna au o Waiaū,
 Mahalo i ka nani o Hilo,
 Kehakeha ke one i Ohele la,
 Kapaia māi e ka Malanai.

Nani wale ka liko o ka Hinano,
 I ke kupu ohaoha i ka uka,
 I ka luna wale o Waikii,
 Kiina ka ono ia Hiku,
 I loa ko puni kauoha,
 Māi na kōpuna māi,
 Hana ae nei ka anoi la,
 No Likelike no he Inoa.

NIHOA KEAOMAKANI.

BE STILL OE.

Hoonua Hilo i ka lehua, la,
 Wehiwehi Puna i ka ulu hala,
 Haale ka wai o Kamaile,
 Hoolai na manu o kanahele.

HUI:—Be still oe e iala la,
 Ei aku oiala ko'u koolua la,
 Ko'u kuleana paa no ia la,
 Kohu ai o ka'u hooniponipo.

No ka helu ekahi ae no au la,
 No ka hulu mamō i Olaa la,
 Ua laa no au me iala la,
 Me Hiku i kanahele.

Heaha hoi kau e Apapane la,
 E hana wale mai nei no ia'u la,
 I ka manu ua laa mua la,
 Ia maile Kalukaluhea.

KUU WAI LILII MOKIHANA.

Lai ka makani ahiahi,
 Kolokolonaha e ka hau,
 Lau lipolipo ke aloha,
 Hana e la iloko lilo.

HUI:—Kuu wai lili mokihana,
 Apapane wai a ka manu,
 He alihi wehi ka lehua,
 He lalawe lima onaona.

Ke ala kai hiki mai,
 Ua hui ae la Maukele,
 Pakele mai Hiilawe,
 I ka nui manu o ka uka.

E hoi oe i ka home,
 I ka wao ala kanahele,
 E noho au me ka lia,
 Me ke aloha haalipo.

E PILI, E PILI.

Ia'u la i hoolai iho ai,
Pa ana ka makani Moae
Hoolale mai ana ia'u e nate,
Hoi mai kaula e pili.

HUI:—Hoi mai kaula e pili, e pili,
Oiai ka manawa kupono,
E kali no wau nau e kii mai,
Hoi mai kaula e pili,

E ake no wau o ka ike lihi aku,
I na hiona a ke aloha,
Ua like no ia me ka ua nihi pali,
Hoi mai kaula e pili.

KA AWA O PUNA.

Ua nani o Maui ia Haleakala,
Ua ku hookahi Kuahiwi,
A he mea mau no ia kuahiwi,
A he kapu a he kamehai i ka malihini.

HUI:—Mukiki wai e lelehune a ka manu,
O ka awa ili lena i ka uka o ka Lau,
O ka manu ahaihai kanu awa o Puna,
Aia i ka uka laau ka awa o Puna,
||:Mapuna mai ana kona aloha io'u nei,
Hoolaaui mai ana ia'u e moe:||

Ua nani o Hawaii Kilohana i ka lai,
Ua ku ekolu kuahiwi,
Hooihi ka manao e ike i ka nani,
I ke ahi a ka wahine.

Eia Kauwiki la a he aina wai ole,
I ahona i ka wai awilikai,
A he puu kaulana no na 'Lii kahiko,
Ilaila pau Peapea i ke ahi.

MALU ULU.

Kuu ipo i ka lai o Lele,
 I ka home o ka makua,
 A'u i noho ai a kupa,
 I ka lai o ka Ulu o Lele,
 Me he ala e i mai ana,
 Ina kaua e ke hoa,
 Ua malu lai na pali,
 Ke kani mai nei na manu.

Hui:—Nani wale kuu ike ana,
 I ka lai o ka malu Ulu,
 E kau ae nei mamua,
 Kokoke i kuu maka,

Pau ole ko'u ilihia,
 I na Hono o Piilani,
 I ke ku kelakela mamua,
 Ka waiho nani mai o Uo,
 Ka awihi ana iho a ka maka,
 A he nani maoli no,
 Me he ala e i mai ana,
 E uhene maua e uleu.

Kuu ipo i ka uka iu,
 O Maunahoomaha,
 Hoomaha aku au ilaila,
 A iau i ka wai huki niho,
 Owau no me kuu ipo
 Kai honi i ke ala onaona
 E mapu mai ana
 Ke ala o ka Roselani.

KA MALANAI.

Kiina kuu hoa i ka lipo,
 Uluwehiwehi oia nabele,
 I hoa kuwili hoi no'u,
 No nei po anuanu.

HUI:—O oe no ka'u ipo aloha,
 A ka malanai e hiipo'i nei,
 Huihui wale ke aloha,
 Ka hikina mai anuheā.

E maliu mai oe e halia,
 E walea mai la i ka ohu,
 I mehāna nei puuwai anu,
 Kapalili hakukoi i ka lihi,

Me oe ka iini pau ole,
 A'u e dream mau nei,
 I na po mahina lailai,
 Iuiu oia uka lipo.

Noenoe ka hikina mai,
 A ka makani Puulena,
 Hoolā'le mai ana e pili,
 Me kuu hoa i ke ala.

WM. P. LELEIOHOKU.

NA HALA O NAUE.

Nani wale na hala ea, ea,
 O naue i ke kai ea, ea,
 Ke oni ae la ea, ea,
 Pili mai Haena ea, ea,
 Ena aku na maka ea, ea,
 O na manu i ka pua ea, ea.

HUI:—|| :Haina ka inoa ea, ea,
 Kaleleonalani ea, ea ||

A ike i ka lehua ea, ea,
 Mikiala ilaila ea, ea,

Ilaila no au ea, ea,
 Me ka manao pu ea, ea,
 Nani wale kanahale ea, ea,
 I puia i ke ala ea, ea.

Ke ala lauae ea, ea,
 O ka pua Mokihana ea, ea,
 Oni aku na Hono ea, ea,
 Ka pua o Pīlani ea, ea,
 O ko'u lei ia ea, ea,
 O-ua lai nei ea, ea.

HE LEI NA KE ALOHA.

He lei mai nei ko'u,
 O nei ano ahiahi,
 ||:Nai ala i lawe mai,
 A loa au ia nei :||

He lei ua puia,
 I ke ala me ke aloha,
 ||:Palai lau lipolipo,
 I pulu i ka ua Kuahine :||

E malama no wau,
 Ka ilina a ke aloha,
 ||:I kahiko mau no'u,
 No kuu home onaona :||

He wahi misiona kau,
 Na hora o ke aumoe,
 ||:Ko aka ka'u i ike,
 Me ka lei nani pua rose :||

Hone ana i kuu dreams,
 Ka leo o ke Guitar,
 ||:Me ka sweet words nahenahe,
 O opua daimana :||

E hoi no ke aloha,
 I ke ani a ka gentle breeze,
 ||:E pa kolonahe nei,
 I ka liko lau o ka niu :||

PILIPILI KA UA I KANAHELE.

Hookohukohu ko maka i ka pua,
 Hoonohenohea i ka lehua,
 Hoohe luna ua lia loko;
 Ua ono i ka hai mea maikai.

HUI:—Pilipili ka ua i kanahēle,
 Ua kilikilihune kilihau,
 Kilikilihau lililehua,
 No Waiomao i ka uka lai.

Kuhi ana ua like ka manao,
 Me ka ua ula i ka moana,
 Aole oe o ke hoā e kohu ai,
 Na mi nei no ia pua gadinia.

HAUPU HONI I KAMAKANI.

Noenoe kahi aloha,
 I ka ohu o Haupū,
 Kuahiwi hani kamakani,
 Pana kahi lau hinahina.

HUI:—Pupu a paa i ka lima,
 Mokihana pohe kanahēle,
 He mea naenae ke ala,
 Ka maile o Kilohana.

Ua kilika o Keoloewa,
 I ka hone a Kēmamo,
 Wai pukupuku lihilihi,
 Kai honi me Waipio.

Me he kiina ala na ka manu,
 Ka nehe i ka lau laau,
 A loa aku Makaweli,
 I ka hale pupu kani ao.

E ao oe ia Limaloa,
 I na kilioe i ka pali,
 Ne mai nei o Kaipolia,
 I hoā pili o Wailoli.

Kanahēle o Paieie,
 Wao ala o Pihanakalani,
 E hana i ka lokomaikai,
 I nui na makamaka e ke ala.

WAI HUI O KALENA.

Auheā wale ana hoi oe,
 E ka noe lipo i kanāhele,
 Lipolipo i ke oho o ka palai,
 Hoapili o ka Ulalena.

HUI:—Aole no oe e pakele,
 I kahi wai huihui o Kalena,
 Ia wai bui aumeume,
 Me ka rain. Ukiukiu.

A he kiu ka makani o ka aina,
 Hooāe ana i ka nāulu,
 Kahiko i ka luna o Piiholo,
 Haāheo i ka Ulalena.

A heāha ka hana a ka opua,
 Kahiko i ka luna o Kaala,
 A e honi mai ana ke aloha,
 E hoi maua la e pili.

KISS AND NEVER TELL.

Auheā oe e ke onaona,
 E ke hoā lai o ke ahiahi,
 Kaua i ka lai aumoe,
 Kiss and never tell.

Ke ano mai nei kanāhele,
 Aohe lele manu o ke kula,
 Kaua i ka holoholo mahina,
 Kiss and never tell.

No ka lia anuheā ke aloha,
 I ka hāhālia ana mai,
 Kaua i ka lai iuiu,
 Kiss and never tell.

He ma-u ia e ke hoā luhī;
 Hoā alo o ke kai lipolipo,
 Kaua i ka lai anoano,
 Kiss and never tell.

Good night ke aloha ahiahi,
 Hoapili no ka hālia,
 E hoi kaua e pili,
 Kiss and never tell.

IPO LEI LIKO LEHUA.

Anhea oe e ke kupukupu la,
Nene aala o Lihue,
He onaona ka'u i honi la,
Ano wale mai no kona aloha.

HUI:—O oe no ka'u makemake,
E ka ipo lei liko lehua,
E ka manu luu wai la,
Poowai o Kaiona,

Ua kiina ia o Lia la,
A loa i ka lipo kanahale,
Ua noua e ka ua Haoa la,
A mamae ka luna o Kaala la,
Noe liilii mai ana ia'u la,
Na kulu kehau a ka noe,
Pulu oe elo au i ke ala la,
O ka maile laulii.

Aala ka liko lauae la,
Ka palai i wili ia me ka hala,
Me ka poli unaha o Maluaka la,
He puia wale no i ke ala.

KE ANO LAI MAI NEI KANAHELE.

Ke ano lai nei kanahale,
Hele a lulu nehe ole ka makani,
I ka noho a Laieikawai,
Wahine kupua o ka waokele.

HUI:—Mai nana mai oe iaia nei e,
O aloha oe auanei kii mai e,
Ua paa ia nei ka'u kuni la,
Ua sila paa ia me kuu aloha.

Kuu pua kuu lei a-i,
I kui ai au a lawa la,
I lei hoolai no ka la walea,
I mililani na ka manao.

Ilaila no oe e noho mai ai,
Me ke aloha ka halia la,
Oiai ua lai au e noho nei,
Maua pu me kuu aloha.

WAIPUNALAU.

Auheā wale oe e ka Uhiwai,
 Lei aloha a mi nei,
 Alo hooahi iho nei au,
 Mamuli o ke leo.

HUI:—Mea ole ia pouli nui,
 I ke kono ae a loko,
 E ake aku ana no a e ike,
 Kahi wai o Punalau.

U-i ae nei o Emalani,
 Maanei mai kakou,
 E walea ana i ka oluolu,
 I ka malu o ke kukui.

Ilaila makou ikemaka iho,
 I ka wai huna i na pali,
 Pulu-pe ai makou,
 I ka ohu hali ka palai.

H. Q. G. C.

EVER-SWEET.

Auheā wale ana oe,
 E kuu lei Mokihana,
 A'u i kui a lawa,
 I lei hoohiehie.

HUI:—Ua lai ka nohona iho,
 Me kuu ever sweet,
 Hiki e mai ana ka makani,
 Pono ole kahi manao.

Kuu kino kai alo aku,
 I ke anu me ke koekoe,
 Mea ole ia anu nui,
 I ka nui kono a loko.

Ahi wela mai nei loko,
 Ke piipi'i kai mai nei,
 O kona mea mau ia,
 O ka awaawa ahuna.

COME DARLING LEI LEHUA.

O oe noia,
 Kuu lei lehua,
 Ke ala onaona o Panaewa,
 Ua kohu no oe,
 Me ka nani mae ole,
 I lei hoohe no Hilo Bay.

Hui—:Come darling lei lehua,
 Please have a kiss,
 Come darling lei lehua,
 Sweet o Panaewa.

O oe no ia,
 Ka maile laulii,
 Ke sweet onaona o Hanakahi,
 Hookahi no lia,
 E hoi e ike,
 E pili me iala me sweet moonlight.

Ua lia no au,
 E ike ia oe,
 I ka wai lehua a ka manu,
 I ka ua kilihune,
 Noenoe i ka lehua,
 E wehi ae la i kuu sweet Home.

Hoi mai ke aloha,
 Me sweet lei lehua,
 E lei i ke one o Punahoa,
 He hoa no oe,
 I ka wai kilihune,
 I ka wai huihui o Hilo Bay,

Me oe ke aloha,
 E ka nani mae ole,
 Ke sweet forever o Hanakahi,
 Akahi ke aloha,
 Ua hiki mai nei,
 E pili ka lehua o kuu sweet Home.

KA UKA I WAAHILA.

Aloha aloha kuu home,
Home noho a na kini,
Home kipa a ka malihini,
Laukanaka i na manu,
Anoano mai ana ke aloha,
O na la opiopio,
Laulele i ka nui o na hoa,
He mea ole i ke aloha.

HUI:—Hookahi wai o ka like,
I hoa kuwili no ka uka,
O oe a owau ilaila,
I ka rain Tuahine o Manoa,
O ka nihi a ka ua i Waahila,
Kahiko mai la i Manoa,
Ua pono oe e ka ua tilihune,
I ka hone a ka wai o Pualoke,
E ake aku au e ike,
Ka iniki welawela a na ipo,
Ua elo pulu i ka ua noe,
He mea ole i ka manao.

JACK, JOE me ELIZA.

PUA MEGELO NOTE.

Ia oe e ka li'a pau ole,
Pua ala a ka po megelo note,
A'u i hoochiehie ai,
Nani pua lilia o ke kula.

HUI:—E hoi mai e hoi mai kaua,
Wai olu piko o Himela,
I ncho pono iho ka anoi,
Hone ana Dudima i ka poli,

Nani wale kuu ike ana,
I ke koa laukahi o Kapela,
I ka nape holu mai i ka uka,
Moena hanu o Lilikoi.

Kuhi au ua like a like,
Me Onini pua i ka wai,
I ka hooholoholu a iala,
Opi ai ka mino o ke kalohe.

THE EATING OF THE POI.

Oh, dear! Oh, dear! a very queer
 And curious thing I've seen,
 Which takes the shine completely off,
 The wearing of the green;
 Potatoes constitute a dish
 That Irishmen enjoy,
 But it can't hold a candle to
 The eating of the *poi*.

I met a fat *kanaka*, and he
 Asked me to his *hale*,
 He wore no clothes to speak of,
 But a *pa-u* and *papale*,
 Upon a mat cross-legged we sat,
 And there, and then, my boy,
 I was initiated in
 The eating of the *poi*.

A calabash between us stood,
Tutui in a dish,
 And in another one, some
 Animated shrimps and fish;
 We pitched in, and did
 No cutlery employ,
 The finger is the instrument
 For the eating of the *poi*.

You dip it in, and stir it round,
 'Tis difficult to learn,
 And harder to describe the
 Proper scientific turn,
 Sometimes one finger, sometimes two,
 And sometimes three employ,
 According to your appetite
 When eating of the *poi*.

To unaccustomed lips, it has
 A most peculiar taste,
 A strong similarity
 To very ancient paste.
 But when you've clean'd the calabash,
 You want to *hiamoe*,
 And soon get fat as butter, just
 From eating of the *poi*.